

পবিত্র ইঞ্জিল শরিফ ২৭ নম্বর ছিপারা জাইরা কালাম পরিচিতি

জাইরা কালাম ছিপারা খান অইলো, আছমানি কিতাব পবিত্র ইঞ্জিল শরিফর শেষ ছিপারা। আল্লা পাকর হুকুমে অউ ছিপারা লেখছইন, হজরত ইছা আল-মসীর মায়ার সাহাবি হজরত হান্নান (রা:)। হজরত ইছায় বেহেস্তু তশরিফ নেওয়ার বাদে ৬০-৬৫ বছরর কালো ইখান লেখা অইছে। অউ ছিপারা লেখার সময় আল-মসীর উম্মত অকলর উপরে খুব বেশি জুলুম-অত্যাচার আছিল। অউ হালতর মাজে মুমিন অকলরে আশা-উত্সাহ যুগানি, ছবর করা, আর অউ জুলুমর মাজেও ইমানে মজবুত রইয়া আল্লার দরবারর পুরস্কারর লাগি জুইত রইতে পরামিশ দেওয়া অইছে। অউ ছিপারার লগে আগর জমানার নবী হজরত দানিয়াল, হজরত হেজকিল আর হজরত জাকারিয়ার (আ:) কিতাবর লগে বউত মিল আছে। এর মাজে লেখা আছে, কিয়ামতর আগে মুমিন অকলর হাল-হকিকত কিলা অইবো, কতো বেশি জুলুম-মছিবত অইবো, বাদে আল্লা পাকে হজরত ইছা আল-মসীর উছিলায় লান্নতি শয়তানরে এক্কেবারে বিনাশ করিলিবা, আর অউ সময় যেরা ইমানে মজবুত রইবা, তারা আল্লার দরবার থাকি পুরস্কার পাইবা।

ই ছিপারাত পাইবা, সাতটা ইছায়ী জমাতর গেছে চিঠির ভাষায় বয়ানি লেখা আছে। অউ সাতো জমাতর ঠিকানা অইলোগি, হউ আমলর রোমান বাদশাইর আছিয়া দেশ, বর্তমান তুরস্ক দেশর পচ্চিম এলাকা। জমাতর হাল-হকিকত বুজা, আর আমরা জানিয়া হারি নিজর জিন্দেগিত আমল করা জরুর।

অউ ছিপারাত বউত বাতুনি নম্বর লেখা আছে। অউ নম্বরর কিছু মানি অউলা অইতো পারে:

২ = হকর বেয়াপারে সাক্ফি দেওয়া; হামেশা দুইজনর সাক্ফি জরুর।

৪ = আল্লার আরশ আর অউ বেয়াপারে; এরলাগি কাবা শরিফ অইলো চাইর কুনি, যাতে অউ আরশর লগে মিল দেখা যায়।

৬ = মানুষ আর গুনাগার মানষর বেয়াপারে; ছয় নম্বর দিন মানুষ পয়দা, আর ছয় অইলো পবিত্র নম্বর ৭ থাকি কম। এরলাগি ৬৬৬ বুজায়, কিয়ামতর আগে আস্তা দুনিয়ারে বে-পথে নিবার লাগি যে দর্জাল আইবো তার নামর মার্ক বা নম্বর।

৭ = আল্লার পবিত্র নম্বর, খাছ করি তান নিজর পুরাপুর কামর বেয়াপারে; সাত দিনে আছমান-জমিনর হকলতা পয়দা, অউ ছিপারার মাজে আল্লার পুরাপুর পবিত্র প্রজার সাত জমাত, আর তান পুরাপুর গজব ঢালিবার সাত নমুনা বার বার উল্লেখ করা অইছে।

১২ = আল্লার খাছ প্রজা; হজরত ইছার আগে আছিল বনি ইসরাইলর বারো খান্দান, বাদে হজরত ইছার বারোজন খাছ সাহাবি, এরলাগি $১২+১২=২৪$ আর $১২ \times ১২=১৪৪$ বুজায়, হকল জমানার আল্লার খাছ প্রজা অকল।

১০০০ = আস্তা দুনিয়া বা পুরা এক যুগ; এরলাগি ১৪৪০০০ বুজায় হকল জমানার আর আস্তা দুনিয়ার আল্লার খাছ প্রজা অকল।

১২৬০ = সাত বছরর অর্ধেক দিন। উপরর সাত দেখবা।

জাইরা কালাম ছিপারার মাজে নানান নমুনার দরশনর মাজদি, অতীত, বর্তমান, ভবিষ্যত হকল জমানার কথা লেখা অইছে। ১ রুকু ১৯ আয়াতো আছে, “এরলাগিউ তুমি অখন যেতা দেখরায়, এর আগে যেতা ঘটিছে আর বাদে যেতা ঘটিবো, ইতা হকলতা তুমি লেখিয়া থও।”

এরমাজে আছে,

(ক) সাহাবি হান্নানর বেহেস্তু দরশন ১ রুকু

(খ) সাতো জমাতর লাগি উপদেশ ২-৩ রুকু

(গ) আল্লার পবিত্র তখতর দরশন ৪-৫ রুকু

(ঘ) গজবি সাতটা সীল-চাপ্পড় আর সাতটা শিংগা ৬-১১ রুকু

(ঙ) শয়তান দানবর লগে আল্লার খাছ বন্দার যুদ্ধ ১২:১-১৪:৫ আয়াত

(চ) আখেরি সাতটা গজব ১৪:৬-১৬:২১

(ছ) নাফরমান বাবিল টাউনৰ বিচাৰ ১৭:১-১৯:১০

(জ) আখেৰাতৰ বিচাৰ ১৯:১১-২০:১৫

(ঝ) নয়্যা পয়দা ২১-২২ ৰুকু

সাহাবি হান্নানৰ বেহেস্তি দৰশন (১:১-২০)

ছালাম আৰ দোয়া

1 অউ কিতাবো যততা লেখা অইছে, ইতা আল্লা পাকে ইছা আল-মসীয়ে জানাইছইন, আৰ আল-মসীয়ে ইতা জাইৰ করছইন। থুড়া দিনৰ ভিতৰে যেতা যেতা বেয়াপাৰ নিচ্চিত ঘটিবো, ইতা যাতে তান গুলাম অকলে জানইন। আল-মসীয়ে তান ফিরিস্তা পাঠাইয়া নিজৰ গুলাম সাহাবি হান্নানৰে ইতা হকলতা জানাইলা।

2 সাহাবি হান্নানে আল্লাৰ কালাম আৰ ইছা আল-মসীৰ সাক্ষিৰ বেয়াপাৰে যতো দৰশন দেখলা, অউ দৰশনৰ বেয়াপাৰেউ তাইন জবানবন্দি দিলা।

3 আৰ হউ জনউ নেক-কপালি, যেইন ই কালামৰ আগাম খবৰ অকল তিলাওত করইন, আৰ তারাও নেক-কপালি, যেৱা ই কালাম হনইন, হনিয়া হাৰি আমল করইন; কাৰন সময় তো ধাৰো আইছে।

4-5 তে আমি হান্নানে ৰোমান বাদশাইৰ আছিয়া দেশৰ সাতো জমাতৰ গেছে অউ জবানবন্দি লেখরাম। যেইন আছলা, যেইন আছইন আৰ যেইন হামেশা ৰইবা হউ আল্লা পাক, আৰ তান তখতৰ ছামনে যে সাত নমুনায় ৰুহ থাকইন, এৱা আৰ যেইন হক-হালাল সাক্ষি হউ ইছা আল-মসীয়ে তুমৱাৰে ৰহমত আৰ শান্তি দান করউক্কা। তাইন তো মুৰ্দা অকলৰ মাজ থাকি পয়লা জিন্দা অইয়া উঠিছইন, তাইনউ দুনিয়াৰ ৰাজা অকলৰ বাদশা। তাইন আমৱাৰে মহব্বত করইন, এৱলাগি নিজৰ জান কুৱবানি দিয়া, আমৱাৰে গুনাৰ সাজা থাকি বাচাইছইন।

6 তাইন আমৱাৰে লইয়া এক বাদশাই তিয়াৰ কৰিয়া, তান গাইবি বাফ আল্লাৰ এবাদতিৰ লাগি ইমাম বানাইছইন। তান মহিমা আৰ কুদৱতি বল হৱ-হামেশা বওয়াল ৰউক। আমিন।

7 হুনো, তাইন মেঘৰ চাকাত অইয়া তশরিফ আনৱা, পৱতেকে তানৰে চউখদি দেখবো, যাৱা লাকড়িদি বানাইল সলিবো গাথিয়া তানৰে

কাতল করছিল তারাও দেখবো, আর তান লাগি দুনিয়ার হকল জাতিয়ে জুরে জুরে কান্দিবা। অউলাউ অউক, আমিন।

8 আল্লা মাবুদে বাতাইরা, “আমিউ আলিফ আর ইয়া, যেইন আছইন, যেইন আছলা আর যেইন হামেশা রইবা। আমিউ সর্ব-শক্তিমান।”

হজরত ইছার নুরর ছুরত

9 আমি তো তুমরার ভাই হান্নান, হজরত ইছার উম্মত অওয়ায় আমিও তুমরার লাখান একই কষ্ট, একই বাদশাই আর একই ছবরর ভাগি অইছি। আল্লার কালাম তবলিগ করায় আর ইছার পক্ষে জবানবন্দি দেওয়ায় আমারে পাতমুছ নামর দ্বীপো নিয়া বনবাস দেওয়া অইছিল।

10 এরমাজে হজরত ইছার পবিত্র দিন, এক রবিবারে আমি আল্লাই পাক রুহর মাজে পুরাপুর ডুবি গেলাম, অমন সময় আমার খরেদি শিংগার আওয়াজর লাখান এক আওয়াজ হুনলাম।

11 হুনলাম, কুনু এক জনে আমারে কইরা, “হনো, তুমি অখন যেতা দেখরায়, ইতা এক কিতাবো লেখো, লেখিয়া ইফিছ, ইজমির, ফরগাম, থুয়াতির, ছার্দি, ফিলাদিলফিয়া আর লাওদিকেয়া টাউনর সাতো জমাতর গেছে পাঠাও।”

12 আমার লগে যেইন মাতির, তানরে দেখার খিয়ালে আমি খরেদি ঘুরলাম, ঘুরিয়া দেখি, সোনার সাতটা চেরাগ দানি।

13 অউ চেরাগ দানির মাজখানো ইবনে-আদমর লাখান একজনরে দেখলাম। তান ফিন্নো পাও পর্যন্ত লাম্বা পাইঞ্জাবি, আর বুকুর উপরে সোনালী এক পট্টি।

14 তান মাথার চুল দুধর লাখান ধলা চকচকা। তান চউখ আঙুনির লুক্কর লাখান।

15 পাও অইলোগি, আঙুইনদি জালাইয়া মাজিয়া পরিস্কার করা চকচকা পিতলর লাখান, আর তান গলার আওয়াজ অইলো, জুরে জুরে কল-কলাইয়া যাওয়া পানির ফুতর লাখান।

16 তান মুখর ছুরত আছিল পুরা জলমল কররা সুরুজর লাখান। তান মুখ থাকি ধারাইল এখান তলোয়ার বারইলো, ই তলোয়ারর দুইও

গালাবায় ধার আছিল, আর তান ডাইন আতো আছিল আছমানর সাতটা তেরা।

17 তানে দেখিয়া আমি মরার লাখান তান পাওর কান্দাত পড়ি রইলাম। তেউ তান নিজর ডাইনর আত আমার উপরে থইয়া কইলা, “ডরাইও না। আমিউ আউয়াল আর আমিউ আখের,

18 আমিউ হাইউল-কাইয়ুম, যেইন নিজে নিজে হর-হামেশা আছি। আমার মউত অইছিল, অইলে অখন আমি যুগ যুগ ধরি চিরকাল জিন্দা আছি। মউত আর কয়বরর চাবি আমার আতো আছে।

19 এরলাগিউ তুমি অখন যেতা দেখরায়, এর আগে যেতা ঘটিছে আর বাদে যেতা ঘটিবো, ইতা হক্কলতা তুমি লেখিয়া থও।

20 তুমি সোনার যে সাতটা চেরাগ দানি দেখছো আর আমার ডাইন আতো সাতটা তেরা দেখছো, ইতার মানি অইলো, সাতো তেরা অইলো সাত জমাতর সাত জন ফিরিস্তা, সাতটা চেরাগ দানি অইলো ইউ সাতো জমাত।

সাতো জমাতর লাগি উপদেশ (২:১-৩:২২)

2

(১) ইফিছিয়া জমাতর গেছে

1 “ইফিছ টাউনর জমাতর ফিরিস্তার গেছে লেখো: যেইন নিজর ডাইন আতো আছমানর সাতটা তেরা ধরিয়া, সোনার সাতটা চেরাগ দানির মাজখানো চলা-ফিরা করইন, তাইন অউ কথা কইরা,

2 “আমি তো তুমরার কাম-কাজ, তুমরার মেনত আর তুমরার ছবরর কথাও জানি। আমি জানি, তুমরা কুন্জাত বদ মানষরে সইয্য করতায় পারো না, আর সাহাবি না অইয়াও যেগুইন্তে নিজরে সাহাবি কইয়া পরিচয় দেইন, তারারে পরিষ্কা করিয়া দেখছো, আর পরমানও পাইছো তারা যেন বেইমানি মাতেরা।

3 তুমরার বউত ছবর আছে, তুমরা আমার লাগি বউত কষ্ট কররায়, কুন্মশ্তে হেরান অইছো না।

4 “অইলে তুমরার বিরুদ্ধে তো আমার নালিশ আছে, তুমরা পয়লা আমারে যেলা মহববত করতায়, অখন ইতা বাদ দিলাইছো।

5 খুড়া চিন্তা করি দেখো, তুমরা কতো উচা থাকি কতো লামাত লামি গেছ। ই হালত থাকি দিল বদলাইয়া, আগে যেতা করতায় অখন হিরবার অলা করে। আর যুদি দিল না ফিরাও, তে আমি তুমরার গেছে আইয়া তুমরার চেরাগ দানি খান জাগা থাকি হরাইলিমু।

6 তুমরার তো একটা গুন আছে, নিকুলায়তি অকলে যেতা কাম করইন তুমরা ইতারে ঘিনা করে, আর আমিও ইতারে ঘিন করি।

7 “যার কান আছে হে হুনউক, পাক রুহে জমাত অকলরে কিতা বাতাইরা। যে জন জয়ী অইবো তারে আমি আল্লা পাকর জান্নাতুল-ফেরদৌছর জিন্দেগি-গাছর ফল খাইতে দিমু।

(২) ইজমির জমাতর গেছে

8 “ইজমির টাউনর জমাতর ফিরিস্তার গেছে অউ কথা লেখ: যেইন আউয়াল আর আখের, যেইন মারা গেছলা, বাদে জিন্দা অইছইন, তাইন অখান কইরা,

9 “আমি তো তুমরার অভাব-অনটন আর কষ্টর কথা জানি, অইলে এরবাদেও তুমরা ধনি। যেতা মানষে খাটি ইছদি নামে নিজর পরিচয় দেয়, অখচ ইছদির আমল নাই, বরং ইবলিছর দলর মানুষ, ইতায় তুমরার বিরুদ্ধে কিতা মাতির। আমি তো জানি।

10 তুমরা যে মছিবতর মাজে পড়বায়, ই মছিবতরে একদম ডরাইও না। জানো নি, ইবলিছে পরিষ্কা করার নিয়তে তুমরার মাজর কয়জনরে জেলো দিবো, হনো তুমরা দশ দিন কষ্ট পাইবায়। হনো, ইমানর পথে তুমরা মরন পর্যন্ত হক-হালাল রইও, তেউ জয়র মালা হিসাবে আমি তুমরারে আখেরর জিন্দেগি দিমু।

11 “যার কান আছে হে হুনউক, পাক রুহে জমাত অকলরে কিতা বাতাইরা। যে জন জয়ী অইবো, দুহরা বারর মউতে, মানি দোজখে তার খেতি করার কুনু সাইধ্য নাই।

(৩) ফরগাম জমাতর গেছে

12 “ফরগাম টাউনের জমাতের ফিরিস্তার গেছে অউ কথা লেখ: ধার আলা যে তলোয়ারর দুইও গালাবায় ধার আছে, অউ তলোয়ারর মালিকে অখান কইরা,

13 “তুমরা কুন জাগাত বসত কররায় ইতা তো আমি জানি, ইখানো ইবলিছর সিংহাসন আছে। অইলে আমার বেয়াপারে তুমরা হক-হালাল আছে, আমার উপরর ইমানরে অস্বীকার করছো না। আমার তবলিগ কররা হউ হক-হালাল জন আন্তিপাছ যেবলা কাতল অইছলা, ইবলিছর আখড়ার মাজে, তুমরার টাউনো তারে খুন করা অইছিল, হউ সময়ও তুমরার ইমানরে অস্বীকার করছো না।

14 “তা-ও তুমরার বিরুদ্ধে আমার কিছু মাত আছে। তুমরার অনো অলা কিছু মানুষ আছইন, যেতায় মুছা নবীর আমলর ভন্ড নবী বালামর তালিমে চলইন। অউ বালামে বাদশা বালাকরে হিকাইছিল, যাতে হে দেবতার মুতির ছামনর পসাদ খাওয়াইয়া আর জিনা করাইয়া, বনি ইসরাইলেরে গুনার পথে নেয়া।

15 ইতা ছাড়াও নিকুলায়তি অকলর তালিমে যেতা চলইন, অতা কয়গুও তুমরার অনো আছইন।

16 এরলাগি ই হালত থাকি তুমরা দিল বদলাও, আর না বদলিলে আমি খুব জলদি তুমরার ধারো আইমু, আইয়া আমার মুখর তলোয়ারদি তারার লগে জিহাদ করমু।

17 “যার কান আছে হে হনউক, পাক রুহে জমাত অকলরে কিতা বাতাইরা। যে জন জয়ী অইবো, আমি তারে লুকাইল বেহেশ্তি মান্না থাকি থুড়া মান্না আর একটা ধলা পাথর দিমু। অউ পাথরর উপরে অমন এক নাম লেখা থাকবো, ই নাম কেউ চিনে না; যে জনে অউ পাথর পাইবো, খালি হে-উ ই নাম চিনবো।

(৪) খুয়াতির জমাতর গেছে

18 “খুয়াতির টাউনের জমাতর ফিরিস্তার গেছে অউ কথা লেখ: আল্লার খাছ মায়ার জন ইবনুল্লা, তান চউখ অইলো আগুনির লুক্কার লাখান, পাও দুইও খান মাজিয়া পরিস্কার করা চকচকা পিতলর লাখান, তাইন অখান কইরা,

19 “আমি তো তুম্রার কাম-কাজ, তুম্রার মায়া-মহব্বত, ইমান, খেজমত আর তুম্রার ছবরর কথা জানি। আর এওখানও জানি, তুমরা আগে যেতা কাম করছো, অখন এর থাকি আরো বেশি কাম কররায়।

20 “অইলে তুমরা তো ইজাবেল নামর অউ বেটিরে আশ্রয় দিরায়ে, এরলাগি তুম্রার বিরুদ্ধে আমার এখান কথা আছে, তাই নিজরে নবী কইয়া পরিচয় দেয়। আমার বন্দা অকলরে তাই জিনা করা আর দেবতার ছামনর পসাদ খাওয়া হিকাইয়া বে-পথে নেরগি।

21 অউ জিনা থাকি তৌবা করার লাগি আমি তাইরে সময় দিছলাম, অইলে তাই তৌবা করতে রাজি নায়।

22 ছনো, এরলাগি আমি তাইরে এক বিছনাত ফালাইয়া থইমু, তাইর লগে যেতায় জিনা করইন, ইতায় যুদি তৌবা না করইন, তে তারারেও বড় মছিবতো ফালাইমু।

23 তাইর পুয়া-পুড়িনরেও আমি মারিলিমু। তেউ হকল জমাতে জানিলিবা, আমি তো মানষর দিলর আর মনর খবর রাখি। আমি আমল-নমা দেখিয়া তুমরা পরতেক জনর ফল দিমু।

24 থুয়াতিরা জমাতর বাকি মুমিন অকলরে কইরাম, তুমরা যেরা অউ বেটির কথায় চলো না, মানষে যেতারে ইবলিছর গইন তালিম কইন, তুমরা যেরা হউ পথ চিনো না, আমি তুমরারে দুছরা কুনু ভার দিতাম নায়।

25 খালি তুম্রার যেতা আছে, আমি না আওয়া পর্যন্ত অখনাইনরে তুমরা মজবুত করি ধরিয়া রইও।

26 “আমার গাইবি বাফে যেলা হকল জাতির উপরে আমারে খেমতা দিছইন, যেরা জয়ী অইবো, তারারেও আমি অউ খেমতা দিমু। আমি যে কামে খুশি অই অউ কাম যেরা আখের পর্যন্ত করবো, তারা ই খেমতা পাইবা।

27 তারা লুয়ার লাঠি দিয়া ইতারে শাসন করবা, আর মাটির পাতিলর লাখান ইতারে চুরমার করবা।

28 যেরা জয়ী অইবো, আমি তারে ফজরর শুক-তেরাও দিমু।

29 “যার কান আছে হে ছনউক, পাক রুহে জমাত অকলরে কিতা বাতাইরা।

3

(৫) ছাদিঁ জমাতর গেছে

1 “ছাদিঁ টাউনর জমাতর ফিরিস্তার গেছে লেখ: আল্লার সাত নমুনার রুহ আর সাতটা তেরা যেইন ধরিয়া রাখছইন, তাইন অখান কইরা,
 “তুমরার কাম-কাজ তো আমি জানি। তুমরা জিন্দা আছো করিয়া তুমরার বউত সুনাম আছে, অইলে আসলে তো তুমরা মুদা।

2 তুমরা হজাগ অইয়া উঠো, আর বাদ-বাকি যততা মরার পখি অইগেছে, ইতারে বল যুগাও। হনো, আমার আল্লার ছামনে তুমরার এখান কামও আমি সঠিক দেখছি না।

3 এরলাগি তুমরা যেতা পাইছো আর যেতা হনছো, অতা ইয়াদ রাখো আর আমল করো। তুমরার অখনকুর হালত থাকি দিল বদলাও। তুমরা যুদি হজাগ না অও, তে আমি চুরর লাখান লুকাইয়া আইমু, কুন বালা তুমরার গেছে আইমু, তুমরা টেরউ পাইতায় নায়।

4 তে অউ ছাদিঁ জমাতো তুমরার অলা কয়জন মানুষ আছইন যেরার লেবাছো কুনু খুত নাই, মানি তারার চাল-চলন খারাপির বায় গেছে না। তারা পরেজগার বন্দা, এরলাগি তারা পরিস্কার ধলা লেবাছ ফিন্দিয়া আমার লগে চলা-ফিরা করবা।

5 যে জন জয়ী অইবো, হে অলা ধলা লেবাছ ফিনবো। আখেরাতর জিন্দেগি খাতা থাকি তার নাম আমি কুনুদিনও ফুছতাম নায়। বরং আমার গাইবি বাফ আর তান ফিরিস্তা অকলর ছামনে আমি তারে আমার কইয়া স্বীকার করমু।

6 “যার কান আছে হে হনউক, পাক রুহে জমাত অকলরে কিতা বাতাইরা।

(৬) ফিলাদিলফিয়া জমাতর গেছে

7 “ফিলাদিলফিয়া টাউনর জমাতর ফিরিস্তার গেছে লেখ: যেইন হক আর পাক-পবিত্র, যেন আতো বাদশা দাউদ নবীর চাবি আছে, যেইন খুললে আর কেউ বন্দ করতো পারে না, আর বন্দ করলে কেউ খুলতো পারে না, তাইন অখান কইরা,

8 “আমি তো তুমরার কাম-কাজ জানি। হুনো, আমি তুমরার ছামনে এখান দুয়ার খুলা রাখলাম, ইখান বন্দ করার খেমতা কেউরর নাই। আমি তো জানি, তুমরা খুব কমজুর, এরবাদেও তুমরা আমার হুকুম আমল করছে আর আমারে অস্বীকার করছে না।

9 যেরা ইহুদি কইয়া নিজর পরিচয় দেয় অথচ আসল ইহুদি নায়, ইবলিছ-শয়তানর দলর হউ বেইমান অকলরে আমি তুমরার গেছে আনাইমু, তুমরার পাওয়ো ধরাই কদমবুছি করাইমু, আর তারারে জানাই দিমু আমি তুমরারে মহববত করি।

10 তুমরারে ছবর করার লাগি আমি যে হুকুম দিছলাম ইতা তুমরা মানছে; এরলাগি ই দুনিয়ার উপরে মছিবতর যে সময় আইয়া আজের, হউ সময় থাকি আমি তুমরারে হেফাজত করমু। দুনিয়ার মানষরে পরিষ্কা করার লাগি অউ মছিবতর সময় আইবো।

11 “হুনো, আমি খুব জলদি আইরাম। তুমরার যেতা আছে অতারে মজবুত করি ধরিয়া রাখ, যাতে তুমরার জয়র মালা কেউ কাড়িয়া নিতো না পারে।

12 যে জন জয়ী অইবো, তারে আমি আমার আল্লার ঘরর একটা খুটি বানাইমু, হে আর কুনুদিন বারইয়া যাইতো নায়। আমি তার উপরে আমার আল্লার নাম আর আল্লার টাউনর নামও লেখমু। হউ টাউন অইলোগি নয়। জেরুজালেম। বেহেসুর মাজ থাকি, আমার আল্লার ধারো থাকি হউ টাউন লামিয়া আইবো। আর যে জন জয়ী অইবো, তার উপরে আমি আমার নয়। নাম খানও লেখমু।

13 “যার কান আছে হে হুনউক, পাক রুহে জমাত অকলরে কিতা বাতাইরা।

(৭) লাওদিকেয়া জমাতর গেছে

14 “লাওদিকেয়া টাউনর জমাতর ফিরিস্তার গেছে লেখ: যেন নাম আমিন, যেইন হক-হালাল সাক্ফি, যেইন আল্লার পয়দা করা হক্কলতার মুল খুটি, তাইন অখান কইরা,

15 “তুমরার কাম-কাজর কথা তো আমি জানি। তুমরা অইলায় না ঠাভা, না গরম। তুমরা হয় ঠাভা না অয় গরম অইলে ভাল। অইলো অনে।

16 অইলে তুমরা তো উমলি গরম, না ঠান্ডা, না গরম, এরলাগি আমি আমার মুখর ছেফর লাখান থু করি তুমরারে ফালাই দিমু।

17 তুমরা তো কইরায়, তুমরা বউত ধনি, তুমরা বড়লোক অইগেছো, এরলাগি তুমরার কুস্তার অভাব নাই। ইতা খুব ভাল কথা, অইলে আসলে তো তুমরা বুজরায় না, তুমরা খুব দুখি, কাংগাল, গরিব, আন্দা আর লেমটা আছে।

18 এরলাগি আমি তুমরারে অউ উপদেশ দিরাম, আণ্ডইনদি জালাইল খাটি সোনা তুমরা আমার গেছ থাকি লইয়া নেও, যাতে তুমরা হাছারর ধনি অইতায় পারো। আমার গেছ থাকি ধলা লেবাছ লইয়া নিয়া ফিন্দো, তেউ তুমরারে আর লেমটা দেখা যাইতো নায়। আমার গেছ থাকি চখুত লাগানির সুরমা লইয়া নেও, তেউ তুমরা হাছারর চউখে দেখবায়।

19 “ছনো, আমি যেরারে মায়ী করি, তারার দুষ-তিরুটি দেখাই দেই আর শাসনও করি। এরলাগি তুমরা উমলি গরম থাকি পুরা গরম অইয়া তৌবা করো।

20 জানো নি, আমি দুয়ারর গেছে উবাইয়া দুয়ারো ঠুকাইরাম। আমার গলার আওয়াজ হনিয়া যুদি কেউ তার দুয়ার খুলিয়া দেয়, তে আমি তার ভিতরে হমাইমু, তার লগে খানা-দানা খাইমু আর হে-ও আমার লগে খানা-দানা খাইবো।

21 আমি যেলা জয়ী অইয়া আমার গাইবি বাফর লগে তান পবিত্র আরশর কুরছিত বইছি, ঠিক অউ লাখান যে জন জয়ী অইবো, তারেও আমি আমার লগে আমার কুরছিত বওয়ার অধিকার দিমু।

22 “ঘার কান আছে হে ছনউক, পাক রুহে জমাত অকলরে কিতা বাতাইরা।”

আল্লার পবিত্র তখতর দরশন (৪:১-৫:১৪)

4

আল্লার তখতর ছামনে এবাদত

1 এরবাদে আমি দরশন দেখলাম, বেহেস্তর এখন দুয়ার খুলা আছে। আর আমি তান গলার আওয়াজ হনলাম, শিংগার আওয়াজর লাখান যেইন আগে মাতিছিল, তাইন আমারে ডাক দিলা, কইলা, “তুমি অনো উঠিয়া আও। আমি অখন তুমারে দেখাইমু, এরবাদে কিতা কিতা নিচ্চিত ঘটিবো।”

2 ডাক হনার লগে লগেউ আমি পাক রুহে কামিল অইলাম, আর দেখলাম, বেহেস্তর মাজে এখন তখত আছে, অউ তখতর উপরে একজন বওয়াত আছইন।

3 এন ছুরত অইলো, দামি হীরা আর লাল-মনির লাখান। ই তখতর চাইরো গালাবায় আছিল রংধেনু, ইতা দেখতে এক্কেরে কছুয়া পান্না মনির লাখান।

4 অউ তখতর চাইরো কান্দাবায় আরো চব্বিশ খান তখত আছিল, হউ তখতো বওয়াত আছিল চব্বিশ জন মুরব্বি নেতা। এরার লেবাছ আছিল ধলা চকচকা আর মাখাত আছিল সোনার তাজ।

5 মাজ খানর তখত থাকি মেঘর জিলকানি, গুড়-গুড়ি ডাক আর বেজুইতা ঠাঠারি শব্দ বারনিত আছিল। এর ছামনে সাতটা মুশাল জালাইল আছিল, ই মুশাল অইলো আল্লার সাত নমুনর রুহ।

6 তখতর ছামনে ফটিকর গ্লাসর লাখান পরিস্কার কাচর এক দরিয়া আছিল। আর অউ মাজর তখতর চাইরো গালাত চাইর জন জানদার আছিল, এরার ছামনে-পিছে দুইওবায় চউখ অকলে ভরা।

7 পয়লা জানদারটা দেখতে সিংহর লাখান, দুছরাটা বিছালর লাখান, তিন নম্বরটা মানষর লাখান আর চাইর নম্বরটা উড়াল দেওরা চিলর লাখান।

8 অউ চাইরো জানদারর পরতেকর ছয়টা করি ডাখনা আছিল, আর বারে-ভিতরে চাইরোবায় চউখ আছিল। তারা দিন-রাইত হামেশা অউ জিকির কররা,

“কুদুছুন, কুদুছুন, কুদুছুন, রাব্বু ইলাছল ফাদির,

কানা ওয়া-হুয়া কাইনুছ ছাইয়াতিন।

পবিত্র, পবিত্র, পবিত্র আল্লা মাবুদ সর্ব-শক্তিমান,

যেইন আছিল, যেইন আছইন, আর যেইন হামেশা রইবা।”

9 যেইন চিরকালিন জিন্দা, যেইন তখতো বওয়াত আছইন, অউ জানদার অকলে যেবলাউ তান তারিফ, সম্মান আর শুকরিয়া জানাইন,

10 অউ সময় যেইন তখতো বওয়াত আছইন, যেইন চিরকালিন জিন্দা, এন ছামনে হউ চব্বিশ জন মুরবিব নেতা নতো অইয়া সহজদা করইন। ই নেতা অকলে যারযির মাথার তাজ সিংহাসনর ছামনে খুলিয়া থইয়া কইন,

11 “ও আমরার মাবুদ আল্লা,

তুমি তো ইজ্জত, তারিফ আর কুদরতি খেমতার যোইগ্যা।

তুমিউ তো হকলতা পয়দা করছো,

তুমার মর্জিয়ে হকলতা পয়দা অইছে আর টিকিয়া আছে।”

5

গাইবি কিতাব আর মেড়ার বাইচা

1 অউ তখতর মাজে যেইন বওয়াত আছিল, তান ডাইনর আতো আমি এখান কিতাব দেখলাম। কিতাবর বারে-ভিতরে কুস্তা লেখা আছে, ইখান সাতটা সীল দিয়া সীল-চাপ্পড় মারা।

2 বাদে আমি দেখলাম, খুব শক্তিআলা একজন ফিরিস্তায় জুরে জুরে কইরা, “ইলা যোইগ্য কেউ আছইন নি, যেইন অউ সীল-চাপ্পড় ভাংগিয়া কিতাব খান খুলতা পারবা?”

3 অইলে আহমান-জমিন বা পাতালর মাজে ইলা কেউ মিললো না, যেইন ইখান খুলা বা এর ভিতর দেখার যোইগ্যা।

4 তেউ আমি হাম্মানর খুব কান্দন আইলো, কারন ই কিতাব খান খুলার বা এর ভিতর দেখার যোইগ্য একজনও পাওয়া গেল না।

5 বাদে হউ মুরবিব নেতা অকলর মাজর একজনে আমারে কইলা,
 “ওবা, কান্দিও না। হুনো, যেইন এছদা খান্দানর সিংহ, দাউদ নবীর
 বংশধর, তাইন জিতিছইন। তাইন অউ সাতো সীল-চাপ্পড় ভাংগিয়া
 কিতাব খান খুলতা পারবা।”

6 আমি আরো দেখলাম, মুরবিব নেতা অকলর, চাইরো জানদারর,
 আর অউ তখতর মাজখানো এক মেড়ার বাইচা উবাই রইছে। দেখতে
 মনো অইলো, ই বাইচারে জবো করা অইছে। ই মেড়া-বাইচার সাতটা
 হিং আর সাতটা চউখ। আল্লার যে সাত নমুনার রুহরে দুনিয়ার মাজে
 পাঠাইল অয়, অউ সাতো চউখ অইলো হউ সাতো রুহ।

7 বাদে অউ মেড়ার বাইচা আইয়া, তখতো যেইন বওয়াত আছলা,
 এন ডাইন আত থাকি অউ কিতাব খান নিলা।

8 কিতাব নেওয়ার বাদে হউ চাইরো জানদারে আর চবিবশ জন
 মুরবিব নেতায় অউ মেড়ার বাইচারে সহজদা করলা। এরা পরতেকর
 আতো এগু করি সারিন্দা, আর আগর-খুশবয়ে ভরা এগু সোনার বাটি
 আছিল। ই আগর-খুশবয় অইলো আল্লার পাক বন্দা অকলর দোয়া-
 মুনাজাত।

9 আর তারা নয়্য অউ গজল গাইলা,

“খালি তুমিউ সঠিক জন অউ কিতাব খান নিবার,
 নিয়া এর সীল-চাপ্পড় খুলবার।

তুমারে তো কাতল করা অইছিল।

তুমি তুমার লউ দিয়া হক্কল খান্দান থাকি,
 আল্লার লাগি মানুষ খরিদ করছো।

হক্কল জাতর বুলিয়ে মাতরা মানুষ,
 হক্কল দেশ আর জাতি থাকিও খালাছ করছো।

10 এরারে লইয়া তুমি এক বাদশাই কাইম করছো,
 আমরার আল্লার এবাদতির লাগি ইমাম বানাইছো,
 এরাউ আস্তা জগতো বাদশাই করবা।”

11 বাদে আমি চাইলাম, আর হউ তখত, চাইরো জানদার আর মুরবিব নেতা অকলর চাইরোবায় বউত ফিরিস্তা অকলর আওয়াজ হনলাম। ইনো হাজারে-হাজার, কোটি কোটি ফিরিস্তা আছিল।

12 এরা জুরে জুরে অউ গজল কইলা,

“যে মেড়া-বাইচ্চাৰে জবো করা অইছিল,
এইনউ খেমতা, ধন-দৌলত, আখল, বল-শক্তি,
ইজ্জত, গৌরব আর তারিফ পাওয়ার য়োইগ্যা”

13 এরবাদে আমি হনলাম, আহমানো, জমিনো, পাতালো আর দরিয়ার মাজে যতো জানদার আছে, বা ইতার ভিতরে আরো যততা আছে, এরা হক্কেলে অখান কইরা,

“তখতর মাজে য়েইন বওয়াত আছইন,
তাইন আর অউ মেড়া-বাইচ্চার,
তারিফ, ইজ্জত, গৌরব আর খেমতা হর-হামেশা জারি রউকা”

14 তেউ হউ চাইরো জানদারে কইলা, “আমিনা” আর হউ মুরবিব নেতা অকল নতো অইয়া সইজদা করলা।

**গজবি সাতটা সীল-চাপ্পড় আর সাতটা শিংগা
(৬:১-১১:১৯)**

6

কিতাবর পয়লা ছয়টা সীল-চাপ্পড় খুলা

1 বাদে আমি দেখলাম, হউ মেড়ার বাইচ্চায় য়েবলা সাতো সীল-চাপ্পড়র মাজ থাকি পয়লা সীল ভাংগিরা, অউ সময় হউ চাইরো

জানদারর মাজর একজনে ঠাঠা পড়ার আওয়াজর লাখান জুরে কইলা,
“আও।”

2 তেউ আমি চাইয়া দেখলাম, ধলা একটা ঘোড়া, এর উপরে যেইন
ছওয়ার অইছইন তান আতো তীর-ধনুক আছে। তান মাথাত তাজ
লাগাইল অইলো, তাইন জয় করার লাগি জয় করি করি রওয়ানা অইলা।

3 আর তাইন যেবলা দুছরা সীল ভাংগিলা, অউ সময় আমি দুছরা
জানদারর আওয়াজ হনলাম, এইন কইলা, “আও।”

4 তেউ লাল চুরুক আরকটা ঘোড়া বারইলো, আর এর উপরে যেইন
ছওয়ার অইছইন, এনরে অউ খেমতা দেওয়া অইলো, যাতে তাইন
দুনিয়া থাকি হকল শান্তি কাড়িয়া নেইনগি, মানষে একে-অইন্যরে খুন
করইন, এনরে বড় এখান তলোয়ারও দেওয়া অইলো।

5 বাদে মেড়ার বাইচায় যেবলা তিন নম্বর সীল ভাংগিলা, অউ সময়
আমি তিন নম্বর জানদারর আওয়াজ হনলাম, তাইন কইলা, “আও।”
তেউ আমি দেখলাম, একটা কালা ঘোড়া। এর উপরে যেইন ছওয়ার
অইছইন, তান আতো এখান পাল্লা আছে।

6 আর আমি হনলাম, হউ চাইর জন জানদারর মাজখান থাকি কেউ
যানু কইরা, “এক দিনারে খালি এক সের গম বা এক দিনারে তিন সের
বার্লি মিলে। অইলে তুমি জয়তুন আর আংগুর গাছর খেতি করিও না।”

7 অউ মেড়ার বাইচায় যেবলা চাইর নম্বর সীল ভাংগিলা, অউ সময়
আমি হনলাম, চাইর নম্বর জানদারে কইলা, “আও।”

8 তেউ আমি চাইয়া দেখলাম, ছালি রংগর এক ঘোড়া, অউ ঘোড়ার
যেইন ছওয়ার, এন নাম অইলো মউত আর তান খরে খরে কয়বরে
আটের। এরারে দুনিয়ার চাইর বাটর মাজর এক বাটর উপরে খেমতা
দেওয়া অইলো, যাতে তারা তলোয়ার দিয়া, নিদান দিয়া, গজবি মউত
আর জংলি জানুয়ার দিয়া মানষর জান নেইন।

9 বাদে তাইন যেবলা পাচ নম্বর সীল ভাংগিলা, অউ সময় আমি
দেখলাম, কুরবানি খানার তলে অউ লাখান মানষর রুহ অকল আছে,
যেরারে আল্লার কালামর লাগি আর হজরত ইছর পক্ষে জবানবন্দি
দেয়ার লাগি কাতল করা অইছে।

10 এরা জুরে জুরে কইলা, “ও পাক-পবিত্র হক্কানি মউলা, আমরার কাতলর বিচার করতে আর বদলা লইতে, তুমি দুনিয়ার মানষরে আর কতদিন সময় দিতায়?”

11 তেউ এরা হকলরে ধলা লেবাছ দান করা অইলো, আর কওয়া অইলো, তারার লগর খেজমতগার আর তারার যতো ভাইয়াইনরে তারার নমুনায় কাতল করা অইবো, এরার সংখ্যা পুরা না অওয়া পর্যন্ত, আরো কিছু দিন বার চাইতে অইবো।

12 বাদে আমি দেখলাম, মেড়ার বাইছায় ছয় নম্বর সীল ভাংগিলা, অউ সময় খুব বড় ভৈছাল অইলো। সুরুজর রং অইগেল কালা ছিয়াই আর ভরা চান্দর রং অইলো লউর লাখান লাল।

13 তুফান আইলে যেলা ডুমুর গাছ থাকি কাচা ফলও তুফানে ফালাই দেয়, ঠিক অউলা আছমানর তেরা অকল খুলিয়া জমিনর উপরে পড়িগেল।

14 আস্তা আছমান দলা অইয়া কাগজর পুটলা লাখান বনিয়া গাইব অইগেল। পাড়-পর্বত আর দ্বীপ অকলও যারযির জাগা থাকি হরিগেল।

15 আর দুনিয়ার হকল রাজা-বাদশাইন, নামকরা জন, সিপাইর পরধান, জমিদার, পয়লোয়ান, গুলাম বা আজাদ পরতেক জনউ পাড়র গাতে গাতে, পাথরর আওড়ে লুকাইলো।

16 তারা অউ পাড় আর পাথর অকলরে কইলো, “আমরার উপরে আইয়া পড়ে, যেইন তখতো বওয়াত আছইন তান চউখর ছামন থাকি আর মেড়ার বাইছার গজব থাকি আমরারে লুকাও।

17 তারার গজবি হউ কিয়ামতর দিন তো আইছে, অখন আর টিকিয়া থাকার সাইধ্য কার আছে?”

7

আল্লার সীল-চাপ্পড় মারা গুলাম

1 এরবাদে আমি দেখলাম, দুনিয়ার চাইর কুনাত চাইর জন ফিরিস্তা উবাই রইছইন। তারা দুনিয়াত, দরিয়াত আর হকল গাছ-পালাত বাতাস হামানির দুয়ার বন্দ করার লাগি উবাইছইন।

2 বাদে আমি দেখলাম, পুবে থাকি আরক জন ফিরিস্তা উঠিয়া আইরা, জিন্দা আল্লার সীল-চাপ্পড় তান গেছে আছে। তাইন আইয়া যে চাইর জন ফিরিস্তারে দুনিয়া আর দরিয়ার খেতি করার লাগি খেমতা দেওয়া অইছিল, হউ চাইরো ফিরিস্তারে জুরে জুরে ডাকিয়া কইলা,

3 “আমরা যতোবইল আমরার আল্লার গুলাম অকলর কপালো সীল না মারছি, অতোবইল তুমরা দুনিয়ার, দরিয়ার বা গাছ-পালার খেতি করিও না।”

4 বাদে আমি হউ সীল-চাপ্পড় মারা মানষর পরিমান হনলাম। বনি ইসরাইলর হকল খান্দান থাকি এক লাখ চৌচাল্লিশ আজার জনরে সীল মারা অইছে।

5 এহদা খান্দানর বারো আজার জন সীল মারা;

রুবেন খান্দান থাকি বারো আজার;

ছাদু খান্দান থাকি বারো আজার;

6 আশির খান্দান থাকি বারো আজার;

নপ্তালি খান্দান থাকি বারো আজার;

মানশা খান্দান থাকি বারো আজার;

7 ছামাউন খান্দান থাকি বারো আজার;

লেবি খান্দান থাকি বারো আজার;

ইছাখর খান্দান থাকি বারো আজার;

8 সবুলন খান্দান থাকি বারো আজার;

ইউছুফ খান্দান থাকি বারো আজার;

বিন-ইয়ামিন খান্দান থাকি বারো আজার জন সীল মারা।

ধলা লেবাহ ফিন্দা মানষর মিছিল

9 বাদে আমি দেখলাম, পরতেক দেশ, হকল খান্দান, হকল জাতি আর হকল জাতর বুলিয়ে মাতরা বউত মানুষ দলা অইছইন, এরায়ে গনিয়া ফুড়ানির সাইধ্য কেউরর নাই। এরা ধলা লেবাহ ফিন্দিয়া খেজুর

পাতা আতো লইয়া, হউ তখত আর মেড়ার বাইচ্চার ছামনে উবাই রইছইন।

10 তারা জুরে জুরে কইরা,

“আমরার আল্লা যেইন তখতো বওয়াত আছইন,
আর মেড়ার বাইচ্চার আতোউ,
গুনার মাফি আর নাজাত আছে।”

11 এরবাদে তামাম ফিরিস্তা অকল, হউ তখতর, হউ মুরবিব নেতা অকলর আর চাইরো জানদারর চাইরো কান্দাবায় উবাইলা। তারা তখতর ছামনে সহইজদাত পড়িয়া কইলা,

12 “আমিন।
তারিফ, গৌরব, আখল আর শুকরিয়া,
ইজ্জত, খেমতা আর বল-শক্তি,
যুগে যুগে আমরার আল্লারউ অউক।
আমিন।”

13 বাদে মুরবিব নেতা অকলর মাজর একজনে আমারে কইলা,
“বুজরায় নি, ধলা লেবাছ ফিন্দা অউ মানুষ অকল কে, এরা কুয়াই থাকি আইছইন?”

14 আমি তনরে কইলাম, “ও মালিক, ইতা তো আপনেউ জানইন।”
তেউ তাইন কইলা, “এরা অইলা হউ জন অকল, যেরা হউ মহা মছিবতর মাজ থাকি আইছে। তারার লেবাছরে মেড়ার বাইচ্চার লউদি ধইয়া ধলা বানাইছে।

15 এরলাগি এরা আল্লার তখতর ছামনে আছে;

তারা দিন-রাইত বেহেশ্তি এবাদত খানার মাজে এবাদত-বন্দেগি কররা।

আর তখতো যেইন বওয়াত আছইন,
তাইন নিজে এরার উপরে তাষু টানাই দিবা।

16 এরার আর কুনুদিন ভুক লাগতো নায়,
পানির পিয়াছে ধরতো নায়;
সুরুজর তেজ এরার গতরো লাগতো নায়,
কুনু গরমও লাগতো নায়।

17 তখতর মাজর মেড়ার বাইচ্চায়উ এরার রাখালি করবা।
তাইন এরারে আবে-হয়াতর
জিন্দেগি-পানির বরনার গেছে লইয়া যাইবা,
আর আল্লায় এরার চউখর পানি ফুছিয়া দিবা।”

8

সাত নম্বর সীল-চাপ্পড় খুলার ঘটনা

1 বাদে অউ মেড়ার বাইচ্চায় যেবলা সাত নম্বর সীল-চাপ্পড় ভাংগিলা,
অউ সময় অনুমান আধা ঘন্টা সময় বেহেশ্তো কুনু আওয়াজ হনা গেল
না।

2 আর যে সাত জন ফিরিস্তা আল্লার ছামনে উবাত থাকইন, আমি
এরারে দেখলাম, এরার আতো সাতটা শিংগা দেওয়া অইলো।

3 এরবাদে আরক জন ফিরিস্তা আইয়া কুরবানি খানার ছামনে
উবাইলা। তান আতো সোনার আগর-খুশবয় দানি। তখতর ছামনর
আগর জালানির সোনার টেবুলর উপরে জালানির লাগি বউত আগর-
খুশবয় তানরে দেওয়া অইলো, আল্লার তামাম পাক বন্দা অকলর
দোয়া-মুনাজাতর লগে মিশানির লাগি ইতা দেওয়া অইলো।

4 এরলাগি হউ ফিরিস্তার আতর আগর-খুশবয়র ধুমার লগে, পাক
বন্দা অকলর দোয়া-মুনাজাতও আল্লার ছামনে উঠলো।

5 বাদে অউ ফিরিস্তায় কুরবানি খানা থাকি আগুইন নিয়া আগর দানিত ভরলা, ভরিয়া ইতা দুনিয়াত ফলাইল। তেউ ঠাঠারি আওয়াজ, মেঘর ডাক, জিলকানি, আর ভেছাল অইলো।

সাতটা শিংগা

6 আর হউ যে সাতজন ফিরিস্তার আতো সাতটা শিংগা আছিল, এরা অউ শিংগা বাজানির লাগি জুইত অইল।

7 পয়লা ফিরিস্তায় শিংগা বাজানির লগে লগে লউ মাখাইল হিল আর আগুইন জমিনো ফলাইল অইলো। তেউ জমিনর তিন বাটর এক বাট, গাছ-গাছালির তিন বাটর এক বাট, আর হকল ঘাস-পাতা জলি গেল।

8 এরবাদে দুহরা ফিরিস্তায় তান শিংগা ফুকিলা। অউ সময় জলাইল পাড়র লাখান মোটা এক চিজ দরিয়াত ফলাইল অইলো। ইতায় দরিয়ার তিন বাটর এক বাট পানি লউ অইগেল।

9 দরিয়ার তিন বাটর এক বাট জানদার মরিগেল, তিন বাটর এক বাট জাজ বিনাশ অইগেল।

10 বাদে তিন নম্বর ফিরিস্তায় তান শিংগা ফুকিলা। তেউ আছমানর চকচকা বিরাট এক তেরা বড় মুশালর লাখান জলি জলি তলে পড়লো, ইটা আইয়া হকল গাংগ, খাল-বিলর তিন বাটর এক বাটর উপরে পড়লো।

11 অউ তেরার নাম আছিল নাগদানা। ইটা পড়িয়া তিন বাটর এক বাট পানি তিত্বা-জহর অইগেল, ই পানির লাগি বউত জন মরলা।

12 আর চাইর নম্বর ফিরিস্তায় যেবলা শিংগা ফুকিলা, অউ সময় চান্দ, সুরুজ আর তেরা, ইতা হকলতার তিন বাটর এক অংশ জখম অইগেল, তেউ হকলতার তিন বাটর এক বাট আন্দাইর অইগেল, এরলাগি দিনর তিন বাটর এক বাটো আর রাইতর তিন বাটর এক বাটো কুনুজাত রুশনি রইলো না।

13 বাদে আমি চাইলাম, চাইয়া দেখি, একটা চিল পাখি বউত উচাত আছমানর মাজেদি উড়ের, আর হে জুরে জুরে মাতের, “বাকি যে তিন জন ফিরিস্তায় শিংগা ফুকিবা, তারার শিংগা ফুকিলে দুনিয়ার বাসিন্দা অকলর উপরে গজব, গজব, গজব লামবো।”

9

1 বাদে পাচ নম্বর ফিরিস্তায় শিংগা ফুকিলা, তেউ আমি দেখলাম, আছমানর একটা তেরা বেহেস্তু থাকি দুনিয়াত পড়লো। অউ তেরারে হাবিয়া দোজখর চাবি দেওয়া অইলো।

2 তেউ হে হাবিয়া দোজখর দুয়ার খুললো, বউত বড় ডমকা থাকি যেলা ধুমা বারয়, ই দোজখ থাকি অলা ধুমা বারইলো। অউ দোজখি ধুমায় আছমান আর সুরুজ আন্দাইর অইগেল।

3 হউ ধুমা থাকি বউত পংগপাল বারইয়া দুনিয়াত আইলা। ইতারে দুনিয়ার কাকড়া-বিছার লাখান খেমতা দেওয়া অইলো।

4 তারারে হুকুম দেয়া অইলো, তারা যানু দুনিয়ার কুনু ঘাস-পাতা, গাছ-পালা বা হাগ-তরকারির খেতি না করে। খালি যেতা মানষর কপালো আন্নার সীল-চাপ্পড় মারা নাই, অতার খেতি করইন।

5 ইতা মানষরে জানে মারার কুনু খেমতা তারারে দেওয়া অইলো না, অইলে পাচ মাস পর্যন্ত জালা-যন্ত্রনা দিবার খেমতা দেওয়া অইলো। কাকড়া-বিছায় কুনু মানষরে কামড় দিলে যেলা বিষ-বেদনা অয়, অউ পংগপালে কামড়ইলেও অলা অইবো।

6 হউ সময় মানষে মউত মাংগিবা, তা-ও মউত অইতো নায়। তারা মরতা চাইবা অইলে মরন তারার গেছ থাকি বাগিবো।

7 ই পংগপাল অকল দেখতে যুদ্ধর লাগি জুইত করা ঘোড়ার লাখান। তারার মাখাত সোনার তাজর লাখান চিজ আছিল, আর মুখর গঠন অইলো মানষর লাখান।

8 তারার চুল অইলো বেটিস্তর চুলর লাখান আর দাত অইলো সিংহর দাতর লাখান।

9 তারার বুকুর মাজে আছিল লুয়ার পাতর লাখান খসখসা ছাল। যুদ্ধর ঘোড়ার গাড়ি টানিয়া ঘোড়ার পাল একলগে গেলে যেলা আওয়াজ অয়, তারার ডাখনার আওয়াজও আছিল অউ লাখান।

10 তারার লেইনজ আর লেইনজর মুখর বিষ-দাত আছিল কাকড়া-বিছার লাখান। পাচ মাস ধরি মানষরে কষ্ট দিবার খেমতা ই লেইনজো আছে।

11 হাবিয়্যা দোজখর ফিরিস্তা আছিল। অউ পংগপালর রাজা। ইবরানি ভাষায় ই ফিরিস্তার নাম অইলো আবাদন, আর ইউনানি বা গ্রীক ভাষায় এর নাম অইলো আপল্লিয়ন, মানি গজবি ফিরিস্তা।

12 পয়লা গজব হরলো, অইলে হনো, আরো দুইটা গজব আইয়া আজের।

13 বাদে ছয় নম্বর ফিরিস্তায় তান শিংগা ফুকিলা। তেউ আল্লার ছামনর আগর জালানির সোনার টেবুলর চাইরটা হিংগর গেছ থাকি আমি একজনরে অখান কইতে হনলাম,

14 এইন হউ শিংগা আলা ছয় নম্বর ফিরিস্তারে কইলা, “মহা গাংগ ফোরাতির মাজে যে চাইর জন ফিরিস্তা আটক আছইন, তারারে খুলিয়া দেও।”

15 এরলাগি হউ চাইরো ফিরিস্তারে ছাড়ি দেওয়া অইলো। দুনিয়ার তিন বাটর এক বাট মানষরে মারার লাগি অউ ফিরিস্তা অকলরে সঠিক সময়, সঠিক দিন, মাস আর বছরর লাগি জুইত করি রাখা অইছিল।

16 বাদে আমি হনলাম, ঘোড়াত চড়িয়া যাওয়া অউ সিপাইর পরিমান আছিল বিশ কোটি।

17 অউ দরশনো আমি যতো ঘোড়াইন আর ঘোড়-ছওয়ার অকল দেখলাম, ই ছওয়াররে দেখতে অলা লাগলো, এরার বুকুর উপরর ফৌজি লেবাহ আগুলির লাখান লাল, আকাশর লাখান লীল আর গন্ধকর লাখান অলদিয়া। ঘোড়াইন্তর কল্লা আছিল সিংহর কল্লার লাখান, ইতার মুখে থাকি আগুইন, ধুমা আর গন্ধক বারর।

18 এরার মুখর অউ আগুইন, ধুমা আর গন্ধকর গজবদি তিন বাটর এক বাট মানুষ মারা অইলো।

19 ই ঘোড়াইন্তর লেইনজ আর মুখর মাজেউ আছিল তারার বল, ই লেইনজ আছিল দু-মুখি হাফর লাখান। অউ লেইনজদি তারা মানষর খেতি করে।

20 অইলে অউ গজবর বাদেও যেতা মানুষ জিতা রইলা, তারা নিজর আতর বানাইল মূর্তিপুজা থাকি তৌবা করলো না। তারা নানান নমুনর ভুতর পুজা, আর যেতায় দেখইন না, হনইন না বা আটা-চলা করতা পারইন না অতা মূর্তির পুজা করাত রইলা। সোনা, রূপা, পিতল, পাথর আর লাকড়িদি বানাইল মূর্তিপুজাত রইলা।

21 এরলগে খুন-খারাপি, যাদু-টুনা, জিনা আর চুরি থাকিও তৌবা করলো না।

10

ফিরিস্তা আর হরু-মুরু কিতাব

1 বাদে আমি দেখলাম, বেহেস্তু থাকি খুব শক্তিআলা আরক জন ফিরিস্তা লামিয়া আইরা। মেঘর চাকা আছিল তান লেবাহ, তান মুখ সুরুজর লাখান চকচকা, তান পাও আছিল আগুনির খুটির লাখান। তান মাথার উপরে আছিল রংধেনু।

2 তান আতো হরু-মুরু এখন কিতাব খুলা আছিল। তান ডাইনর পাও দরিয়াত আর বাউওর পাও জমিনর উপরে থইয়া,

3 সিংহর লাখান খুব জুরে গর্জিয়া উঠিলা। অউ গর্জনর লগে লগেউ ঠাঠা পড়ার মত সাতটা আওয়াজ অইলো।

4 অউ সাতো আওয়াজ হনিয়া আমি লেখাত লাগলাম; এরমাজে বেহেস্তু থাকি অউ শব্দ অইলো, “হনো, অউ সাতো ঠাঠারি আওয়াজে যেতা কইছইন, ইতা বাতুনি রাখো, লেখিও না।”

5 বাদে হউ ফিরিস্তা, যেনরে আমি দরিয়া আর জমিনর উপরে উবাত দেখছলাম, তাইন বেহেস্তুর বায় নিজর ডাইন আত তুললা।

6 তুলিয়া যেইন হর-হামেশা চিরকাল জিন্দা আছইন, যেইন আছমান, জমিন, দরিয়া আর ইতার মাজর হক্কলতা পয়দা করছইন, তান নামে কছম খাইয়া কইলা, “আর তো দেরি অইতো নায়।

7 অইলে সাত নম্বর ফিরিস্তায় শিংগা ফুকিবর দিন আল্লার বাতুনি লিলা-খেলা পুরা অইবো। আল্লায় তান নিজর গুলাম, নবী অকলর গেছে যেলা বাতাইছলা, অউলাউ ফলিবো।”

8 বেহেস্তু থাকি আগে যে শব্দ হুন্ছিলাম, এইন হিরবার আমারে কইলা, “হনো, দরিয়া আর জমিনর উপরে যে ফিরিস্তা উবাত আছইন, তান গেছে যাও, গিয়া তান আত থাকি খুলা কিতাব খান নেও।”

9 তেউ আমি এন গেছে গিয়া কইলাম, অউ হরু-মুরু কিতাব খান আমার আতো দেওয়ার লাগি। তাইন কইলা, “আইছা নেওগি, নিয়া

খাইলাও। ইখানে তুমার পেটরে তিত্বা করিলিবো, অইলে তুমার মুখে মউ লাখান মিঠা লাগবো।”

10 অউ আমি হি ফিরিস্তার আতর হরু-মুরু কিতাব খান নিয়া খাইলিলাম। খাইতে সময় হাছাউ আমার মুখে মউ লাখান মিঠা লাগলো, আর গিলিয়া হরলে আস্তা পেট তিত্বা অইগেল।

11 বাদে আমারে কওয়া অইলো, “তুমি বউত দেশ, বউত জাতি, নানান বুলিয়ে মাতরা মানুষ, আর বাদশার বেয়াপারে হিরবার ওহী জানাইতে অইবো।”

11

দুইজন সাক্ষি

1 বাদে মাপিবার লাগি লাঠির লাখান একটা নল আমার আতো দেওয়া অইলো, আর একজনে কইলা, “ছনো, পবিত্র বায়তুল-মুকাদ্দছ কাবা শরিফ আর কুরবানি খানারে মাপো। মাপিয়া হনো যেরা এবাদত করে তারার পরিমান গনো।

2 অইলে অউ কাবা ঘরর উঠানরে মাপিও না, ইখান বাদ দেও, ইখান তো বিধর্মী অকলরে দেওয়া অইছে। তারা বেয়াল্লিশ মাস ধরি ই পবিত্র জাগা খানরে পাওদি কছলাইবো।

3 আর আমি আমার দুইজন সাক্ষিরে অলা খেমতা দিমু, ই খেমতা পাইয়া এরা কাতর অইয়া ছলার চট ফিন্দিয়া, এক আজার দুইশো সাইট দিন নবীর লাখান ওহী বাতাইবো।”

4 এরা অইলা হউ জয়তুন গাছ জুড়া, আর হউ চেরাগ দানি জুড়া, তারা তো দীন-দুনিয়ার মালিকর ছামনে উবাত আছইন।

5 কেউ তারার খেতি করতে চাইলে, তারার মুখ থাকি আগুইন বারইয়া হি দুশমন অকলরে জালাইলিবো। যেকুনু জনে তারার খেতি করাত লাগলে অউ দশায় মউত অইবো।

6 এরা যতদিন নবী হালতে ওহী বাতাইবো, অতো দিন যাতে কুনু মেঘ না অয় এরলাগি আছমানর দুয়ার বন্দ করি দিবার খেমতা তারার আছে।

পানিরে লউ বানানি, আর যতবার খুশি অতবার যেকুনু গজব ঢালিয়া জগতর খেতি করার খেমতাও তারার আছে।

7 তারার জবানবন্দি দেওয়া শেষ অইগেলে হাবিয়া দোজখ থাকি হউ জানুয়ার উঠিয়া আইয়া তারার লগে লাড়াই করিয়া, তারারে আরাইয়া খুন করবো।

8 আর তারার লাশ হউ মহান টাউনর রাস্তার মাজে পড়ি রইবো, যে টাউনো তারার মালিকরে সলিবর উপরে লটকাইয়া খুন করা অইছিল। ই টাউনর নাম ঠিক ছাদুম বা মিসর না অইলেও একই লাখানউ খারাপ।

9-10 হউ সময় হকল দেশ, খান্দান, হকল জাতর বুলিয়ে মাতরা মানষে আর হকল জাতির মানষে সাড়ে তিন দিন ধরি অউ লাশগুইন দেখবা। আর এরা মারা গেছইন করি জগতর দুনিয়াবি মানষে খুশিয়ে ফুর্তি-আমোদ করবা, একে-অইন্যরে উপহার দিবা। আর ই লাশ দাফন করার পারমিশন দিতা নায়, কারন অউ দুইও নবীর লাগি দুনিয়াদারি মানষর কষ্ট অইছিল।

11 বাদে হউ সাড়ে তিন দিন পারইয়া হারলে আল্লার দেয়া জান এরর ভিতরে হামাইলো, তেউ এরা পাওয়ো ভরদি উবাইলো। আর যতো জনে এরারে দেখলা, হকলেউ ডরাইয়া কাপিলা।

12 বাদে এরা হুনলা, বেহেস্তু থাকি ডাকিয়া জুরে জুরে কওয়া অর, “তুমরা অনো উঠিয়া আইও” তেউ এরা নিজর দুশমনর ছামনে এক মেঘর চাকাতে অইয়া বেহেস্তু গেলাগি।

13 অউ সময় খুব বড় ভৈছাল অইলো, আর হি টাউনর দশ বাটর এক বাট ভাংগি গেল। ভৈছালে সাত আজার মানুষ মরলা। ইতা দেখিয়া বাদ-বাকি হকলে ডরাইয়া বেহেস্তুর আল্লার তারিফ করাত লাগলা।

14 অউ নমুনায় দুছরা গজব পারইলো, অইলে হনো, তিন নম্বর গজব খুব জলদি আইয়া আজিবো।

সাত নম্বর শিংগা ফুকিলা

15 বাদে সাত নম্বর ফিরিস্তায় তান শিংগা ফুকিলা। তেউ বেহেস্তুর মাজে জুরে জুরে এলান করা অইলো, “অখন তো দুনিয়ার বাদশাই

আমরার মাবুদ আর তান মসীর হুকুমো আইছে। তাইন যুগ যুগ ধরি চিরকাল বাদশাই করবা।”

16 বাদে হউ চব্বিশ জন মুরবিব নেতা, যেরা আল্লার ছামনে যারযির তখতো বওয়াত আছলা, এরা আল্লারে সইজদা করিয়া কইলা,

17 “ও সর্ব-শক্তিমান মাবুদ আল্লা,
তুমি আগেও আছলায় আর অখনও আছো।

আমরা তুমার শুকুর-গোজার কররাম,
তুমি তো তুমার মহা খেমতা আতো লইয়া অখন বাদশাই কররায়।

18 হক্কল জাতিয়ে গুছা করিয়া চিল্লাইছে,
তে অখন তুমার গজব ঢালিবার সময় অইগেছে।

মুর্দা অকলর বিচারর সময় আইছে,
আর তুমার আপন গুলাম নবী অকলর,

তুমার পাক বন্দা অকলর,
হরু-বড় যতোজনে তুমারে ডরাইন,
তারারে পুরুস্কার দিবার সময় আইছে।

আর যেরা দুনিয়ার খেতি করছে,
তারারে বিনাশ করার সময়ও আইছে।”

19 বাদে আল্লার বেহেস্তর এবাদত খানার দুয়ার খুলা অইলো, আর এর ভিতরে আল্লাই শাহাদত সন্দুক দেখা গেল। অউ সময় মেঘর জিলকানি, গুড়-গুড়ি ডাক, ঠাঠা পড়া, ভৈছাল আর খুব বেশি হিল-মেঘ অইলো।

**শয়তান দানবর লগে আল্লার খাছ বন্দার যুদ্ধ
(১২:১-১৪:৫)**

12

হউ বেটি আর দৈত্য-দানব

1 বাদে আছমানর মাজে এক কুদরতি কারবার দেখা গেল, একজন বেটি মানুষ আছইন, তান ফিনো আছিল সুরুজ আর পাওর তলে চান্দ, এন মাখাত আছে বারোটা তেরা দিয়া গাথা একটা তাজ।

2 বেটির ঘরো হুরুতা অইতা, এরলাগি হুরুতা অওয়ার বেদনায় বেটিয়ে খালি চিল্লাইরা।

3 এরবাদে আছমানো আরক কারবার দেখা গেল, আশুনির লাখান লাল এক বিরাট দানব। তার সাতটা মাথা আর দশটা হিং, সাতো মাখাত সাতটা তাজ লাগাইল।

4 তার লেইনজুড়দি বাড়িয়াইয়া আছমানর তিন বাটর এক বাট তেরারে দুনিয়াত ফালাই দিলো। আর যে বেটির ঘরো হুরুতা অইতা, অউ দানব আইয়া বেটির ছামনে অউ নমুনায় উবাত আছিল যেন, বেটির ঘরো হুরুতা অইতেউ হে খাইলিতো।

5 বেটির ঘরো এক পুয়া পয়দা অইলো, অউ পুয়ায় হক্কল জাতিরে লুয়ার লাঠি দিয়া শাসন করবা। অউ হুরুতারে আল্লা আর তান তখতর গেছে ছু মারি তুলিয়া নেওয়া অইলো।

6 আর অউ বেটি মানুষ মরুভুমির বায় বাগিয়া গেলাগি। আল্লায় হি মরুভুমির মাজে বেটির লাগি এখান জাগা জুইত করছিলো, এইন হনো এক আজার দুইশো ষাইট দিন লালন-পালন পাইবা।

7 বাদে বেহেস্তু যুদ্ধ লাগিগেল। ফিরিস্তা মিকাইল আর তান অধীনর ফিরিস্তা অকলে হউ দানবর লগে লাড়াই করলা, আর হউ দানবেও তার চেলা-চামছারে লইয়া এরার লগে লাড়াই করলো।

8 লাড়াইত হি দানব আরিগেল, আর তারারে বেহেস্তু থাকি বার করি দেওয়া অইলো।

9 হউ দানবরে আর তার চেলা-চামছা অকলরে দুনিয়াত ফালাই দেওয়া অইলো। অউ দানব অইলো হউ পুরানা হাফ, যেগুর নাম ইবলিছ-শয়তান, হে দুনিয়ার হকল মানষরে বে-পথি বানায়া।

10 বাদে আমি হুনলাম, বেহেস্তু থাকি একজনে জুরে জুরে কইরা, “অখন তো আমরার আল্লার নাজাত, তান বল-শক্তি, তান বাদশাই

আর তান মসীর খেমতা আজির অইগেছে। কারন যোগিয়ে আমরার ভাইয়াইন্তরে দুষি বানাইতো, তারে তো বেহেস্তু থাকি ফালাই দেওয়া অইছে। হে দিন-রাইত হামেশা আমরার আল্লার গেছে তারার নামে নালিশ দিতো।

11 মেড়ার বাইচ্চার লউ আর যারযির তবলিগি জবানবন্দির বলে তারা ইবলিছরে আরাইছইন। তারা নিজর কায়ারে বেশি মায়া না করিয়া, জান দিতেও জুইত আছলা।

12 “এরলাগিউ ও বেহেস্তু, তুমি খুশি করো। তুমরা যেরা বেহেস্তু বাসি, তুমরাও ফুর্তি করো। অইলে আফছুছ দুনিয়া আর দরিয়ার লাগি, ইবলিছ তো তারার গেছে লামিগেছে। হে গুছায় ফুস-ফাস করের, হে তো জানেউ, তার সময় আর বেশি নাই।”

13 হউ দানবে য়েবলা দেখলো তারে দুনিয়াত ফালাই দেওয়া অইছে, দেখিয়া হউ য়ে বেটির ঘরো পুয়া পয়দা অইছিল, হে অউ বেটির খরে লাগলো।

14 এরলাগি অউ বেটিরে খুব বড় এক চিল পাখির দুখান ডাখনা দেওয়া অইলো, বেটিয়ে অউ ডাখনাদি উড়াল দিয়া মরুভূমিত নিজর জাগাত যাইতা পারবা। হনো হউ দানব-হাফর চউখর আওড়ে সাড়ে তিন বছর তানরে লালন-পালন করা অইবো।

15 তেউ হি হাফে তার মুখ থাকি পানি বার করিয়া এক গাংগ বানাইলিলো, গাংগর ফুতে বেটিরে ভাসাই নিতোগি করি।

16 অইলে দুনিয়ায় বেটিরে সাইয্য করলো, ই হাফে য়ে পানি বার করলো, দুনিয়ার মাটিয়ে আ করিয়া ই পানিরে খাইলিলো।

17 এরলাগি ই দানব-হাফে বেটির বায় আরো বেশি গুছা করলো, হে বেটির অইন্য আওলাদ অকলরে, মানি য়েরা আল্লার হুকুমে চলে আর হজরত ইছার পক্ষে জবানবন্দি দেয়, তারার লগে যুদ্ধ করাত গেল।

18 গিয়া হে দরিয়ার চরর বালুর উপরে উবাই রইলো।

13

দরিয়া থাকি আওয়া জানুয়ার

1 বাদে আমি দেখলাম, দরিয়া থাকি এক জানুয়ার উঠের, তার দশগু হিং, সাতগু কল্লা, পরতেক হিংগর মাখাত একটা করি তাজ, আর পরতেক কল্লার উপরে নানান কুফুরি নাম লেখা।

2 ই জানুয়ারগু দেখতে চিতা বাঘর লাখান, তার পাও অইলো ভালুকর পাওর লাখান, আর মুখ অইলো সিংহর মুখর লাখান। হউ দানবে তার শক্তি, তার গদি আর মহা খেমতা অউ জানুয়াররে দিলাইলো।

3 ই জানুয়ারর একটা কল্লার মাজে অমন এক জখম আছিল, অউ জখমে হে মরার লাখ অইগেছিল, অইলে জখমটা ভালা অইগেল। ইতা দেখিয়া দুনিয়ার হকল মানুষ তাইজুব বনিয়া তার খরে খরে গেল।

4 আর হউ দানবে তারে ই খেমতা দিছিল করি মানষে হউ দানবরে সহজদা করলো, এরলগে অউ জানুয়াররেও সহজদা করলো। তারা কইলো, “ই জানুয়ারর লাখান আর কে আছে? তার লগে লাড়াই করার খেমতা কার আছে?”

5 ই জানুয়াররে কুফুরি বুলি আর বেটাগিরি মাতর মুখ দেওয়া অইলো। বেয়াল্লিশ মাস ধরি তার কাম চালানির খেমতা পাইলো।

6 এরলগি হে আল্লার বিরুদ্ধে কুফুরি মাত মাতিলো, হে আল্লার নাম, তান বসত খানা আর বেহেস্ত বাসি অকলর বদনাম করাত রইলো।

7 তারে খেমতা দেওয়া অইলো, হে আল্লার পাক বন্দা অকলর বিরুদ্ধে যুদ্ধ করিয়া জিতিতো পারবো। আর পরতেক খান্দান, পরতেক দেশ, পরতেক জাতি, পরতেক নমুনার বুলিয়ে মাতরা মানষর উপরেও তারে খেমতা দেওয়া অইলো।

8 ইতা দেখিয়া দুনিয়াবি হকল মানষে তারে সহজদা করবো। জগত পয়দা করার আগে যে মেড়া-বাইচ্চারে জবো করার কথা সাইবস্তো করা অইছে, হউ মেড়া-বাইচ্চার জিন্দেগি খাতাত যেরার নাম নাই, এরা পরতেকে তারে সহজদা করবো।

9 যার কান আছে, হে হনউক:

10 যে জন বন্দি অওয়ার কথা, হে তো বন্দি অইবোউ।

তলোয়ারর তলে যার খুন অওয়ার কথা, হে অলা খুন অইবো।

এরলাগি পাক বন্দা অকলে মজবুত ইমান আর ছবর করা জরুর।

জমিন থাকি বারইল জানুয়ার

11 বাদে আমি দেখলাম, জমিন থাকি আরকটা জানুয়ার বারইয়া আইলো। মেড়ার হিংগর লাখান তার দুই হিং আছে, অইলে হে মাতিতো হউ দানবর লাখান।

12 অউ মেড়ার হিং আলা জানুয়ারে হউ পয়লা জানুয়ারর হকল খেমতা বেবহার করতো। দুনিয়ার হকল মানষরে হে জুর করিয়া হউ জখম ভালা অওয়া পয়লা জানুয়াররে সহজদা করাইতো।

13 হে হকলর ছামনে বড় বড় কেলামতি কাম করতো, এমনকি আছমান থাকি জমিনো আগুইন লামাইয়া দেখাইতো।

14 হউ পয়লা জানুয়ারর লাগি যতো লাখান কেলামতি দেখানির খেমতা তারে দেওয়া অইছিল, অতা দেখাইয়া হে মানষরে বে-পথি বানাইলো। পয়লা যে জানুয়ার তলোয়ারর ছেদ খাইয়াও বাচি গেছিল, তার একটা মূর্তি বানানির লাগি দুছরা জানুয়ারে মানষরে পরামিশ দিল।

15 আর মূর্তির ভিতরে জান হরানির খেমতা তারে দেওয়া অইলো, যাতে ই মূর্তিয়ে মাতিতো পারে, আর ঘেরা ই মূর্তিরে সহজদা করতো নায়, তারারে জানে মারার খেমতাও তারে দেওয়া অইলো।

16 হে হুরু-বড়, ধনি-গরিব, মুনিব বা গুলাম হকলরে বাইধ্য করলো, যারঘির ডাইন আতো বা কপালর উপরে একটা সীল মারার লাগি।

17 এরলাগি অউ সীল ছাড়া কেউ কুנו চিজ খরিদ-বিকির উপায় রইলো না। ই সীল আছিল হউ জানুয়ারর নাম বা নামর মার্কা নম্বর।

18 ইতা হকলতা বুজতে বউত আখলর দরকার। যার আখল আছে হে অউ জানুয়ারর নামর হরফর নম্বর গনউক, ইতা তো কুנו মানষর নামর নম্বর। এর পরিমান অইলো, ৬৬৬; ছয়শো ছয়ষট্টি।

14

মেড়ার বাইছা আর নিখুত মানুষ

1 বাদে আমি চাইয়া দেখি, হউ মেড়ার বাইচা জেরুজালেমর পবিত্র ছিয়ন পাড়র উপরে উবাই রইছইন। তান লগে আছইন এক লাখ চৌচাল্লিশ আজার মানুষ। তারার কপালর উপরে অউ মেড়ার বাইচা আর তান গাইবি বাফর নাম লেখা আছে।

2 এরবাদে আমি বেহেস্তু থাকি জুরে জুরে কল-কলাইয়া যাওয়া পানির ফুতর আওয়াজ আর জুরে ঠাঠা পড়ার শব্দর লাখান এক আওয়াজ হনলাম। আমার মনো অইলো, কুন্ সারিন্দা বাজাওরা দলে সারিন্দা বাজাইরা।

3 এরা হউ তখত, হউ চাইরো জানদার আর হউ মুরবিবী নেতা অকলর ছামনে এক নয়া গজল গাইরা। কুন্ মানষে ই গজল হিকতো পারলো না, খালি দুনিয়া থাকি খালাছ করি নেওয়া অউ এক লাখ চৌচাল্লিশ আজার জন ছাড়া।

4 এরা তো হউ মানুষ, যেরা কুন্ বেটিস্তর লগে জিনা করিয়া নিজর কায়ারে নাপাক বানাইছে না। অউ মেড়ার বাইচা যে জাগাত যাইন, তারাও এন খরে খরে রইন। আল্লা আর মেড়ার বাইচার নামে খেতর পয়লা ফসল হিসাবে এরায়ে জগতর মানষর গেছ থাকি খালাছ করা অইছিল।

5 এরা কুন্দিনও মিছা মাত মাতিছইন না, এরা ষোলআনা নিখুত।

আখেরি সাতটা গজব (১৪:৬-১৬:২১)

তিন জন ফিরিস্তা

6 বাদে আমি আরক জন ফিরিস্তা দেখলাম, এইন আছমানর মাজেদি উড়িরা। দুনিয়াত বসত কররা পরতেক দেশ, পরতেক খান্দান, পরতেক ভাষায় মাতরা আর পরতেক জাতির মানষর লাগি চিরকালিন খুশির খবর তান গেছে আছে।

7 তাইন জুরে জুরে এলান করলা, “আল্লা পাকরে ডরাও, তান ইজ্জত-তারিফ করো, তান বিচারর সময় আইছে। যেইন আছমান-জমিন, দরিয়া আর খাল-বিল, গাংগ অকল পয়দা করছইন, তান এবাদত করো।”

8 বাদে তান খরে খরে দুছরা ফিরিস্তা আইয়া কইলা, “বিনাশ অইগেল, বিনাশ অইগেল, হউ নামকরা বাবিল টাউন বিনাশ অইগেল।

যে টাউনে তাইর জিনার কামর কড়া নিশা-পানি হকল জাতিরে খাওয়াইছে, তাই বিনাশ অইগেল।”

9 বাদে তিন নম্বর ফিরিস্তা এয়ার খরে খরে আইয়া জুর গলায় কইলা, “কুনু মানষে যুদি অউ জানুয়ার আর অগুর মূর্তির পুজা করে, অগুর সীল তার আতো বা কপালো লাগায়,

10 তে হে-ও আল্লাই গজবি নিশা-পানি খাইতে অইবো। অউ নিশার লগে কুনুজাত পানি না মিশাইয়া আল্লাই গজবি বাটিত ভরা অইছে। পবিত্র ফিরিস্তা অকল আর আল্লাই মেড়ার বাইচ্চার হামনে, আগুইন আর গন্ধক দিয়া ই মানষরে সাজা দেওয়া অইবো।

11 যে আগুনিত ইতারে জলাইল অইবো, ই আগুনির ধুমা কুনুদিন বন্দ অইতো নায়া। যে মানষে অউ জানুয়ার আর তার মূর্তির পুজা করবো, অগুর নামর হউ সীল লাগাইবো, হে দিন-রাইত কুনু সময়উ আজাব থাকি রেহাই পাইতো নায়া।”

12 এরলাগি ঘেরা আল্লার হুকুম মানে আর হজরত ইছার তরিকার ইমানে মজবুত রয়, আল্লার অউ পাক বন্দা অকলে ই হালতর মাজে ছবর থাকা জরুর।

13 বাদে আমি ছনলাম, বেহেস্তু থাকি একজনে কইরা, “অউ আয়াত লেখ, অখন থাকি মালিকর তরিকাত রইয়া যতো জনর জান যাইবো, এরাউ নেক-কপালি।” পাক রুহে অউ সাক্ষি দিরা, “নিচ্চয় এরাউ নেক-কপালি। তারার কাম-কাজ থাকি তারা রেহাই পাইবা, কারন তারার কামর ফল তারার লগে লগে রইবো।”

দুনিয়ার ফসল কাটা

14 বাদে আমি চাইয়া দেখলাম, ধলা এক মেঘর চাকা, অউ চাকার উপরে বিন-আদমর লাখান কেউ একজন বওয়াত আছইন। তান মাখাত সোনার তাজ আর আতো আছিল ধারাইল কাচি।

15 বাদে আরক জন ফিরিস্তা বেহেস্তু এবাদত খানা থাকি বারইয়া আইলা, আর যেইন মেঘর উপরে বওয়াত আছলা তানরে জুরে চিল্লাইয়া কইলা, “দুনিয়ার ফসল কাটিবার সময় অইছে, ফসল পুরাপুর পাকি গেছে, আপনার কাচি লাগাউক্কা আর ফসল কাটউক্কা।”

16 তেউ অউ মেঘর চাকার উপরে যেইন বওয়াত আছিল, এইন দুনিয়াত তান কাচি লাগাইলা আর দুনিয়ার ফসল কাটা অইলো।

17 বাদে বেহেস্তর এবাদত খানা থাকি আরক জন ফিরিস্তা বারইয়া আইলা, তান গেছেও এখান ধারাইল কাচি আছিল।

18 এরবাদে কুরবানি খানার গেছ থাকি একজন ফিরিস্তা বারইয়া আইলা, তান খেমতা আছিল আগুনির উপরে। আইয়া তাইন জুরে জুরে হউ কাচি আলা ফিরিস্তারে ডাকিয়া কইলা, “তুমার ধারাইল কাচি খান লাগাও আর দুনিয়ার আংগুর গাছ থাকি আংগুরর ছড়িন কাটিয়া দলা করো, ইতা তো পাকি গেছে।”

19 তেউ হউ ফিরিস্তায় দুনিয়াত তান কাচি লাগাইলা আর দুনিয়ার আংগুর গাছর হকল আংগুর দলা করিয়া, আংগুর মাড়ার গাতো ফালাইলা। অউ গাত অইলো আল্লার গজবর মহা গাত।

20 টাউনর বারে আংগুর মাড়ার গাতো ই আংগুর মাড়িয়া হারলে, ইতা থাকি লউ বারইলো, ই লউর বইন্যায় ঘোড়াইন্তর লাগাম পর্যন্ত আইয়া হইলো। লউয়ে এক আজার ছয়শো স্তাদিয়া (অনুমান দুইশো মাইল) জাগা ডুবি গেল।

15

আখেরি সাত গজব

1 বাদে আমি বেহেস্তর মাজে আরকটা লিলা-খেলা দেখলাম, ইটা বড় মহান তাইজ্জুবি। আমি দেখলাম, সাতজন ফিরিস্তা আছইন, এরার আতো আখেরি সাতটা গজব। ইতারে আখেরি গজব কওয়ার কারন অইলো, অগুইন দিয়া আল্লা পাকর গুছার শেষ ফয়ছালা অইবো।

2 বাদে আমি দেখলাম, আগুইন আলা এক কাচর দরিয়া, আর যতো মানষে হউ জানুয়ার, তার মুর্তি বা তার নামর নম্বরর উপরে জিতছইন, তারারেও দেখলাম। দেখলাম, তারা আল্লার দেওয়া সারিন্দা আতো লইয়া কাচর দরিয়ার পারো উবাই রইছইন।

3 তারা আল্লার বন্দা মুছা নবীর আর হউ মেড়ার বাইচ্চার অউ কাওয়ালি গাইরা,

“ও সর্ব-শক্তিমান মাবুদ আল্লা,
 তুমার লিলা-খেলা কত মহান আর আচানক!
 ও তামাম জাতির বাদশা,
 কত হক আর সঠিক তুমার পথ!
 4 ও মাবুদ, তুমারে ডরাইতো নায় কুন জনে?
 কুন জনে তুমার নামর তারিফ করতে নায়?
 খালি তুমিউ তো পাক-পবিত্র,
 তামাম জাতিউ আইবো তুমার দরবারো,
 হক্কেলেউ তুমার এবাদত করবো,
 তুমার হক বিচার তো জাইর আইগেছে।”

5 এরবাদে আমি দেখলাম, বেহেস্তর হউ শাহাদত তাশ্বুর ভিতরর পবিত্র কাবা ঘর খান খুলা আইলো।

6 অউ সময় হউ সাতজন ফিরিস্তায় সাতটা গজব লইয়া কাবা ঘর থাকি বারইয়া আইলো। তারার ফিল্মর লেবাছ আইছিল চকচকা পরিস্কার আর বুকুত আইছিল সোনালী পট্টা।

7 হউ চাইর জন জানদারর একজনে অউ সাতো ফিরিস্তারে সাতটা সোনার বাটি দিলা। ই সাতো বাটি ভরা আইছিল খালি আল্লা পাকর গুছা, যেইন যুগে যুগে হর-হামেশা জিন্দা আইহিন।

8 আল্লার কুদরতি মহিমা থাকি যে ধুমা বারনিত আইছিল, অউ ধুমায় আস্তা ঘর ভরি গেল। আর অউ সাতজন ফিরিস্তার সাতটা গজব না ফুড়ানি পর্যন্ত কেউ গিয়া কাবা ঘরো হামাইতো পারলো না।

16

আল্লার গজবি সাতটা বাটি

1 বাদে আমি হনলাম, হউ কাবা ঘর থাকি একজনে অউ সাতো ফিরিস্তারে জুরে জুরে ডাকিয়া কইরা, “তুমরা যাও, গিয়া আল্লার গজবে ভরা অউ সাতো বাটি দুনিয়ার উপরে উপইত করি ঢালি দেও।”

2 তেউ পয়লা ফিরিস্তায় গিয়া তান বাটি দুনিয়ার উপরে উপইত করলা। এরলাগি যারার গতরো হউ জানুয়ারর সীল আছিল, যেরা তার মূর্তির পুজা করতো, ইতা হক্কলটির গতরো এক জাতর খুব বাদ বিষ ফুড়া দেখা দিলো।

3 দুছরা ফিরিস্তায় তান বাটি দরিয়র উপরে উপইত করলা। তেউ দরিয়র হক্কল পানি মরা মানষর লউর লাখান অইগেল, দরিয়র হক্কল জানদার মরিগেল।

4 আর তিন নম্বর ফিরিস্তায় তান বাটি গাংগ আর হক্কল খাল-বিলর উপরে উপইত করলা। এরলাগি ইতা অইগেল লউর গাংগ আর খাল-বিল।

5 আর আমি হনলাম, পানির উপরে যে ফিরিস্তার খেমতা আছিল, এইন কইরা,

“ও পাক-পবিত্র আল্লা, তুমি আগেও আছলায়, অখনও আছো।
তুমি হক-ইনছাফকারি, তুমিউ তো ই গজবি সাজা দিরায়া।

6 ইগুইন্তে পাক বন্দা অকলর লউ ঝরাইছে,
নবী অকলরও লউ ঝরাইছে।

এরদায়উ তুমি ইতারে অউ লউ খাবাইরায়,
ইতাউ তারার সঠিক পাওনা সাজা।”

7 আমি হনলাম, কুরবানি খানায় সায় দিলা,

“ও সর্ব-শক্তিমান মাবুদ আল্লা,
তুমার হক্কল বিচারউ হক আর সঠিক।”

8 চাইর নম্বর ফিরিস্তায় তান বাটি সুরুজর উপরে উপইত করলা। তেউ সুরুজরে খেমতা দেওয়া অইলো, মানষরে আগুনিত জালাইয়া কুলশ তুলার লাগি।

9 অউ সময় খুব গরমে মানষর শরিল জলি গেল, আর অউ গজব অকলর উপরে যান খেমতা আছে, হউ আল্লার বিরুদ্ধে তারা কুফুরি মাত মাতিলো। অততার বাদেও তারা তৌবা করলো না, বা আল্লার তারিফও করলো না।

10 বাদে পাচ নম্বর ফিরিস্তায় হউ জানুয়ারর গদির উপরে তান বাটি উপইত করলা। তেউ ই জানুয়ারর বাদশাই আন্দাইর অইগেল। মানষে জালা-যন্দ্রনায় যারযির জিবো কামড়াইলো।

11 অউ জালা-যন্দ্রনা আর শরিলর বিষ ফুড়ার কারনে তারা বেহেস্তি আল্লার বিরুদ্ধে কুফুরি মাতো রইলো, অতার বাদেও তারার বদ কামর লাগি তৌবা করলো না।

12 আর ছয় নম্বর ফিরিস্তায় হউ মহা গাংগ ফোরাতর উপরে তান গজবি বাটি উপইত করলা। তেউ গাংগর পানি হুকাইয়া পুবর দেশর রাজা অকলর যাইবার পথ অইলো।

13 অউ সময় আমি দেখলাম, বেঙর লাখান তিনটা ভুত। ই তিনোটা হউ দানব, হউ জানুয়ার আর হউ ভন্ড নবীর মুখ থাকি বারইয়া আইছে।

14 অউ ভুত অকলে কেলামতি কাম দেখানিত আছিল। তারা হারা জগতর রাজা অকলরে এখানো দলা করলো, সর্ব-শক্তিমান আল্লার হউ মহান দিনো যুদ্ধ করার লাগি।

15 মনো রাখিও, হজরত ইছায় কইরা, “ছনো, আমি তো চুরর লাখান নিরালায় আইমু। তে ধইন্য হউ জন, যে জন হজাগ রইবো আর নিজর লেবাছ ফিন্দিয়া রইবো, যাতে হে লেমটা অইয়া ঘুরা না লাগে, আর মানষে তার শরম না দেখে।”

16 ইবরানি ভাষায় যে জাগার নাম আর-মাজাদুন, ভুত অকলে হউ রাজাইন্তরে আনিয়া অনো দলা করলা।

17 বাদে সাত নম্বর ফিরিস্তায় তান বাটি বাতাসর উপরে উপইত করলা। অউ সময় বেহেস্তি এবাদত খানার তখত থাকি জুরে জুরে অউ আওয়াজ অইলো, “অখন অইছে।”

18 তেউ মেঘর জিলকানি, গুড়-গুড়ি ডাক আর ঠাঠা পড়তো লাগলো, এরলগে অলা বেজুইতা ভৈছাল অইলো, ইলা ভৈছাল দুনিয়াত মানুষ পয়দা থাকি অখন পর্যন্ত কুন্দি অইছে না।

19 হউ মহান টাউন তিন টুকরা অইগেল, দুনিয়ার নানান জাতির টাউন অকল চুরমার অইগেল। আর আল্লা পাকর মনো অইলো, হউ নামকরা বাবিল টাউনর কথা, তাইন তান নিজর গজবি নিশা-পানির পিয়াল ভরিয়া অউ বাবিলরে খাবাইলা।

20 অউ সময় তামাম দ্বীপ অকল বাগিয়া গেলগি, পাড় অকলরে আর দেখা গেল না।

21 আছমান থাকি বড় বড় পাথরর লাখান হিল অকল মানষর উপরে পড়াত রইলো। ইতা একো পাথরর উজন অইলো, অনুমান এক মন। অউ হিলর গজবর লাগি মানষে আল্লার বিরুদ্ধে কুফুরি মাত মাতিলো, ইতা আছিল খুব মারাত্মক গজব।

নাফরমান বাবিল টাউনর বিচার (১৭:১-১৯:১০)

17

নামকরা মহা বদমাইশনি

1 যে সাতজন ফিরিস্তার আতো সাতটা বাটি আছিল, এরার মাজর একজনে আইয়া আমারে কইলা, “আও, আইয়া দেখো, বউত পানির উপরে যে মহা বদমাইশনি বইছে, তাইর কিতা সাজা অইবো।

2 জগতর রাজা অকলে তাইর লগে জিনা করছলা, হনর মানষে তাইর জিনার নিশা-পানি খাইয়া টাল অইছলা।”

3 বাদে হউ ফিরিস্তায় রুহানি হালতে আমারে মরুভূমিত নিলা। হনো আমি দেখলাম, লাল রংগর এক জানুয়ারর উপরে এক বেটি বইরইছে। অউ জানুয়ারর গতরো বউত কুফুরি নাম লেখা আছে। অঞ্জর সাতগু কল্লা আর দশগু হিং দেখলাম।

4 অউ বেটিয়ে লাল আর বাইংগনি রংগর খুব দামি কাপড় ফিন্দিছে, তাই সোনা আর দামি দামি মনি-মুক্তার গয়নাদি হাজিছে। তাইর আতো

জিনার ময়লা আর নানান নমুনার নফরতি জিনিসে ভরা সোনার এক পিয়লা।

5 তাইর কপালো অলা এক নাম লেখা আছিল, ই লেখার এক গোপন মানি আছিল। ই নাম অইলো, “নামকরা বাবিল টাউন, বদমাইশ বেটিন আর জগতর হকল নফরতি জিনিসর মা।”

6 আমি দেখলাম, অউ বেটিয়ে আল্লার পাক বন্দা অকলর লউ আর যেরা হজরত ইছার কথা তবলিগ করে, এরার লউ খাইয়া টাল অইগেছে।

তাইরে দেখিয়া আমি আচানক তাইজ্জুব অইলাম।

7 তেউ হউ ফিরিস্তায় আমারে কইলা, “তুমি তাইজ্জুব অইগেলায় কেনে? অউ বেটির বেয়াপারে, আর যে জানুয়ারে তাইরে বইয়া নের, যেগুর সাতগু কল্লা আর দশগু হিং, ইতার গোপন ভেদ আমি তুমারে জানাইয়ার।

8 তুমি যে জানুয়ার দেখছিলায়, ইগু আগে আছিল, অখন নাই, বাদে হে হাবিয়া দোজখ থাকি উঠিয়া আইয়া চিরকালর লাগি সাজা পাইবো। হউ যেরা অউ জগতর মানুষ, যেতার নাম দুনিয়ার পয়লা থাকিউ আল্লার জিন্দেগি খাতাত লেখা নাই, তারা অউ জানুয়াররে দেখিয়া তাইজ্জুব অইযিবা, কারন ইগু আগে আছিল, অখন নাই, অখচ হিরবার দেখা দিবো।

9 “হুনো, অখন যেতা বাতাইল অইবো, ইতা বুজার লাগি আখলর দরকার। অউ সাতো কল্লা অইলোগি, সাতটা পাড়, যে পাড়র উপরে অউ বেটি বইছে। অউ সাতো কল্লারে সাতজন রাজাও বুজা যাইবো।

10 এরার মাজর পাচ রাজা আগেউ শেষ অইগেছে। একজন অখন আছে আর একজন অখনও অইছে না। অউ রাজা আইয়া হারলে থুড়া কয়দিন রইতেউ অইবো।

11 হউ যে জানুয়ার আগে আছিল অখন নাই, হে সাতজনর মাজর একজন অইলেও, হে আসলে আট নম্বর রাজা। বাদে হে হর-হামেশা চিরকাল সাজা পাইবো।

12 “আর তুমি যে দশগু হিং দেখছে, ইতা অইলোগি দশজন রাজা। তারা অখনও রাজত্ব করা শুরু করছে না, অইলে হউ জানুয়ারর লগে

রাজা বনিয়া তারা খুব কম সময় রাজত্ব করার খেঁমতা পাইবো।

13 ই রাজা অকলর মন অইবো একই লাখান, তারা হকলে তারার খেঁমতা আর এখতিয়ার হউ জানুয়াররে দিলাইবো।

14 তারা মেড়ার বাইচার লগে যুদ্ধ করবো, আর মেড়ার বাইচায় তারারে আরাইবা। কারন তাইন অইলা মালিক অকলর মালিক, বাদশা অকলর বাদশা। আর তান লগে যেরা রইবা তারারে দাওত দেওয়া অইছে, আর বাছিয়া আলগাইল অইছে, তারা হক-হলালি।”

15 বাদে অউ ফিরিস্তায় আমারে কইলা, “তুমি যে পানি দেখছো, যে পানির উপরে অউ মহা বদমাইশনি বইছে, ইতা অইলোগি বউত দেশ, বউত মানুষ, বউত জাতি আর বউত জাতর বুলিয়ে মাতরা মানুষ।

16 আর যে দশগু হিং দেখছো, ইতায় আর অউ জানুয়ারে ই বদমাইশনিরে বাদে ঘিন্নাইবা, তারা তাইরে পথর হকির বানাইয়া লেমটা করবা, আর তাইর গোস্ত খাইবা, হেশে তাইরে আগুনিত ফালাই জালাইবা।

17 এর কারন অইলো, আল্লায় তারার দিলর মাজে অলা এক নিয়ত দিছইন, যাতে তান মর্জি পুরাপুর ফলে। এরলাগি তারা একমত অইয়া হউ জানুয়াররে হক্কল খেঁমতা দিলাইবা, যাতে আল্লার কালাম পুরাপুর ফলিবর আগ পর্যন্ত হে রাজত্ব করে।

18 তুমি যে বেটিরে দেখছো, ইগু অইলোগি হউ নামকরা টাউন, ই টাউনে জগতর হকল রাজাইন্তর উপরে রাজত্ব করেরা।”

18

নামকরা বাবিল টাউনর বিনাশ

1 ইতার বাদে আমি আরক জন ফিরিস্তারে দেখলাম, তাইন বেহেস্ত থাকি লামিয়া আইরা। তান বউত বড় খেঁমতা আছে, তান মহিমার বলে আস্তা দুনিয়ায় জলমল করলো।

2 তাইন জুরে জুরে কইলা, “বিনাশ অইগেছে, বিনাশ অইগেছে, হউ নামকরা বাবিল টাউন। ইখান অখন ভুতর আখড়া অইছে, হক্কল

নমুনার ভুত-পেরতর আখড়া, নাপাক আর জগইন্য পাখিস্তর বসত খানা অইছে।

3 কারন ইখানে তাইর জিনার কামর বেজুইতা নিশা-পানি দুনিয়ার হকল জাতিরে খাবাইছে। জগতর রাজা অকলে তাইর লগে জিনা করছে, জগতর বেপারি সদাগর অকলে অখানর তালে তালে লাগাম-ছাড়া নিশায় ধনি বনছে।”

4 বাদে আমি হনলাম, বেহেস্ত থাকি আরক জনে কইরা, “ও আমার বন্দা অকল, তুমরা বাবিল টাউন থাকি বারইয়া আও, যাতে তুমরা তাইর গুনর ভাগি না অও। আর তাইর উপরে যেতা গজব নাজিল অইবো, ইতা গজবে তুমরারে না পায়।

5 তাইর গুনা গিয়া তো আছমানো লাগি গেছে, তাইর নাফরমানির বায় আঙ্লায় খিয়াল করছইন।

6 অইন্য জনর লগে তাই যেলা করছে, তুমরাও তাইর লগে অলা করো, তাইর কামর পুরাপুর পাওনা তাইরে দেও। যে পিয়ালার মাজে তাই অইন্যর লাগি নাফরমানি গুলাইতো, অউ পিয়ালাত তাইর পুরাপুর সাজা, ষোলআনা সাজা গুলিয়া তাইরে খাবাও।

7 তাই নিজরে লইয়া যতখান বড়াই করছে, যতো বেশি বিলাসিতার মাজে জিন্দেগি কাটাইছে, ঠিক অতখান যন্ত্রনা আর দুখ তাইরে দেও। তাই তো মনে মনে কয়, আমি কুণু ডাড়ি বেটি নি? আমি তো রানীর আসনো বইছি, আমি কুণুমশ্তেউ দুখ-মছিবতো পড়তাম নয়।

8 এরলাগি তাইর উপরে একদিনেউ হকল গজব পড়বো। ই গজব অইলো মউত, বিলাপ-আহাজারি আর নিদান। তাইরে আগুইনদি জালাইল অইবো, কারন যেইন তাইর বিচার করবা, ই আঙ্লা মাবুদ খুব বলবান।”

9 জগতর যতো রাজা অকলে অগুর লগে জিনা করছে, তাইর লগে হৈ-হুলা করি বিলাসি দিন কাটাইছে, তাইরে জালানির বাল। তাইর ধুমা দেখিয়া অতায় কান্দিবা, তাইর লাগি আহাজারি করবা।

10 তাইর যন্ত্রনা দেখিয়া তারা ডরাইয়া দুরই উবাইয়া কইবা, “হায়রে বাবিল, হায়রে হায়! অতো নামকরা টাউন, অতো খেমতাআলা টাউন! অলা জলদি তুমার উপরে গজব আইলো নি?”

11 জগতর বেপারি সদাগর অকলেও তাইর লাগি কান্দিবা আর আহাজারি করবা, কারন তারার মাল-ছামানা অখন কুনু মানষে লইতো নায়।

12 তারার ইতা মাল-ছামানা অইলো, সোনা, রুপা, দামি দামি মনি-মুক্তা, দামি দামি কাপড়, বাইংগনি রংগর বাদশাই কাপড়, রেশমি আর লাল কাপড়, নানান নমুনার খুশবয় আলা লাকড়ি, আত্বির দাতদি বানাইল নানান চিজ, দামি লাকড়িদি বানাইল চিজ, পিতল, লুয়া আর মার্বেল পাথরদি বানাইল নানান ছামানা,

13 ডাইল-চিনি, এলাইচ, আগর-খুশবয়, মুরা-আতর, লোবান, আংগুরর রস, জয়তুনর তেল, ময়দা-গম, গরু-মেড়া, ঘোড়া আর ঘোড়ার গাড়ি, এরলগে খরিদা গুলাম-বান্দি অকল।

14 হউ সদাগর অকলে কইবা, “ও বাবিল, তুমি যে আরাম-আয়েশ পাইতায় চাইছলায়, ইতা তো তুমার গেছ থাকি হরি গেছে। তুমার হকল ধন-ছামানা, জাক-জমক বিনাশ অইগেছে। ইতা তো আর কুনুদিনউ ফিরত পাওয়া যাইতো নায়।”

15 যেতা সদাগর অকলে অতা মালর ব্যবসা করিয়া ধনি অইছলা, তাইর যন্তনা দেখিয়া হউ বেপারি অকলে ডরাইয়া দুরই উবাই রইবা। তারা কান্দি কান্দি মাত্ম করিয়া কইবা,

16 “ইস, হায়রে হায়, দামি দামি মসলিন কাপড়, বাইংগনি আর লাল রংগর বাদশাই কাপড় ফিন্দা বাবিল টাউন, সোনা আর দামি দামি মনি-মুক্তা দিয়া হাজাইল-পাড়াইল অতো নামকরা টাউন!

17 অতো জলদি তুমার অতো ধন-ছামানার ভান্ডার বিনাশ অইগেল নি?”

সদাগরি জাজর সারং আর কাপ্তান অকলে, নাইয়া অকলে, জাজ আর পালর নাইয়া কারবারি অকলে দুরই উবাইয়া ইতা দেখবা।

18 তাইরে জালানির সময় তাইর ধুমা দেখিয়া তারা চিল্লাইয়া কইবা, “ই টাউনর লাখান নামকরা, জগতর আর কুনু টাউন আছিল নি?”

19 তারা নিজর মাখাত ধুইল মাখাইয়া চিল্লা-চিল্লি করবা আর কান্দি কান্দি মাত্ম করিয়া কইবা, “হায়রে হায়, হউ নামকরা বাবিল টাউন, হায়রে হায়! দরিয়ার মাজে যেরার জাজ চলাচল করে, তারা তো

জাজর কামাই দিয়া বড়লোক অইছিল, অখন দেখরায় নি, অতো জলদি কিলা হকলতা বিনাশ অইগেল।”

20 অউ সময় হউ ফিরিস্তায় কইলা, “ও বেহেস্ত, তুমি ফুর্তি করো, অউ টাউনরে বিনাশ করায় খুশি করো। ও আল্লার পাক বন্দা অকল, নবী-রছুল অকল আর সাহাবি অকল, ফুর্তি করো। অগিয়ে তুমার বিরুদ্ধে যততা করছিল, অখন আল্লায় তাইর বিচার করছইনা।”

21 বাদে খুব শক্তিআলা এক ফিরিস্তায় বিরাট এক পাথর আনিয়া দরিয়াত ফালাইয়া কইলা, “হুনো, অউ নামকরা বাবিল টাউনরেও অলা ডেক্কা মারি ফালাই দেওয়া অইবো, তাইরে আর কুন্দিন পাওয়া যাইতো নায়া।

22 ঘেরা সারিন্দা বাজায়, গান গায় আর বাশি বা শিংগা বাজায়, তারার আওয়াজ আর কুন্দিন তুমার মাজে হনা যাইতো নায়া। আর কুন্দিনউ তুমার মাজে কুন্জাতর মেস্তুরি মিলতো নায়া। কুন্ মশলা পিষার পাটার আওয়াজ কুন্দিন হনা যাইতো নায়া।

23 তুমার মাজে কুন্দিন কুন্ বাস্তির ফর জলতো নায়া। দামান্দ-কইনার গলার আওয়াজ আর কুন্দিন তুমার মাজে হনা যাইতো নায়া। কারন আস্তা জগতর মাজে তুমার সদাগর অকল নামকরা আছিল, জগতর হকল জাতি তুমার ছল-চতুরির যাদুয়ে পাগল অইযিতো।

24 আর নবী-রছুল অকলরে, আল্লার পাক বন্দা অকলরে, আর যতো মানষরে ই জগতো খুন করা অইছে, তারার লউ তো তুমার অউ বাবিল টাউনো মিলছে।”

19

বেহেস্তো আল্লাতালার তারিফ

1 এরবাদে আমি বেহেস্তর মাজে বউত মানষর ভিড়র আওয়াজ হনলাম। তারা কইরা, “আল-হামদুলিল্লা! মহিমা আর খেমতা, আখেরাতর নাজাত, হকলতাউ আমরার আল্লার।

2 তান বিচার তো হক আর সঠিক। যে টাউনে নিজর জিনার কাম দিয়া আস্তা দুনিয়ারে নাপাক বানাইছিল, হউ মহা-বদমাইশনিরে আল্লায়

সাজা দিচ্ছইন। তান মায়ার গুলাম অকলর লউর বদলা, তাইন অগুর গেছ থাকি লইছইন।”

3 এরা হিরবার কইলা, “আল-হামদুলিল্লা! অগুর মাজ থাকি হর-হামেশা ধুমা বারইবো।”

4 আল্লা পাক যেইন তখতো বওয়াত আছইন, হউ চবিশ জন মুরবিব নেতায় আর হউ চাইরো জানদারে তানরে সইজদা করিয়া কইলা, “আমিন! আল-হামদুলিল্লা।”

5 অউ সময় বেহেস্তু তখতো থাকি একজনে কইলা, “ও আল্লার মায়ার গুলাম অকল, তুমরা যেরা আল্লারে ডরাও, তুমরা হরু-বড় হক্কেলে আমরার আল্লার তারিফ করো।”

6 বাদে আমি বউত মানষর ভিড়র আওয়াজ বা জুরে জুরে কল-কলাইয়া পানি পড়ার আওয়াজ বা জুরে ঠাঠা পড়ার আওয়াজর লাখান অউ কথা খানইন হুনলাম, “আল-হামদুলিল্লা! আমরার সর্ব-শক্তিমান মাবুদ আল্লায় বাদশাই করা শুরু করছইন।

7 আও, আমরা মনর খুশিয়ে ফুর্তি করি, আর তান তারিফ করি, কারন মেড়ার বাইচ্চায় শাদি করার সময় অইগেছে, তান কইনা জুইত অইয়া হাজিগেছইন।

8 তানরে চকচকা পরিস্কার দামি কাপড় ফিন্দাইল অইছে।” ই কাপড় অইলো আল্লার পাক বন্দা অকলর পরেজগারি চাল-চলন।

9 বাদে হউ ফিরিস্তায় আমারে কইলা, “তুমি অখান লেখ, মেড়ার বাইচ্চার শাদির মজলিছো যেরারে দাওত দেওয়া অইছে, তারা মুবারকা” তাইন এওখান কইলা, “ইতা অইলো আল্লার কালাম, ইতা খাটি হাছা।”

10 তেউ আমি অউ ফিরিস্তারে সইজদা করার নিয়তে তান পাওয়ো পড়লাম, অইলে তাইন আমারে কইলা, “হায়, হায়! ইতা কিতা কররায়, আমিও তো তুমার লাখান গুলাম, আর তুমার যে মুমিন ভাই অকলে হজরত ইছার পক্ষে জবানবন্দি দেওয়াত রয়, আমি তারার লাখানও গুলাম। তে খালি আল্লারে সইজদা করো। অউ ইছার জবানবন্দিউ অইলো, নবী-রছুল অকলর জবানবন্দির মুল খুটি।”

আখেৱাতর বিচার (১৯:১১-২০:১৫)

বাদশা অকলর বাদশার জয়

11 বাদে আমি দেখলাম, বেহেশ্তর দুয়ার খুলা, আর হনো ধলা একটা ঘোড়া আছে। হউ ঘোড়ার উপরে যেইন তশরিফ রাখছইন, তান নাম অইলো, হক আর হক-হালালি। তাইন পাক-পরেজগারিয়ে বিচার-ইনছাফ আর যুদ্ধ করইন।

12 তান চউখ অইলো জালাইল চকচকা আগুলির লাখান, তান মাখাত বউত তাজ আছে। তান শরিলো অমন এক নাম লেখা, যে নামর মানি তাইন ছাড়া দুছরা কেউ জানে না।

13 তান ফিন্নো আছে লউর মাজে ডুবাইল লেবাহ, আর তান নাম অইলো, “কালিমাতুল্লা, আল্লার কালাম”

14 আর বেহেশ্তর সিপাই অকলে দামি ছাফ-ছুতরা ধলা লেবাহ ফিন্দিয়া, ধলা ঘোড়ার উপরে ছওয়ার অইয়া তান খরে খরে যাইরা।

15 তাইন যাতে জগতর হকল জাতিরে সাজা দিতা পারইন, অতার লাগি তান মুখ থাকি এখান ধারাইল তলোয়ার বারইয়া অইলো। তাইন লুয়ার লাঠি দিয়া তামাম জাতিরে শাসন করবা, আর আংগুর মাড়ার গাতো মানষে যেলা পাওদি আংগুর মাড়ইন, সর্ব-শক্তিমান আল্লার লাল্লতি গজবদি তাইন অলা মাড়িবা।

16 তান উরাতর মাজে আর তান লেবাহো অউ নাম লেখা আছে, “বাদশা অকলর বাদশা, মালিক অকলর মালিকা”

17 বাদে আমি দেখলাম, সুরজ্জর মাজে একজন ফিরিস্তা উবাই রইছইন। আহমানর মাজে যেতা পাখিস্তে উড়িরা, তাইন এরা হকলরে জুরে জুরে ডাকিয়া কইলা, “আও, আল্লার দরবারো মহা-দাওত খাওয়ার লাগি এখানো দলা আও,

18 যাতে তুমরা আইয়া গোস্ত খাইতায় পারো, বাদশা, পরধান সিপাই, পয়লোয়ান অকল, ঘোড়াইন আর ঘোড়াইন্তর ছওয়ার অকল, আজাদ আর গুলাম, হরু-বড় হকল মানষর গোস্ত খাও।”

19 এরবাদে আমি দেখলাম, অউ ঘোড়াত যেইন ছওয়ার অইছইন, এন লগে আর এন সিপাই দলর লগে যুদ্ধ করার লাগি হউ জানুয়ার, আস্তা দুনিয়ার রাজা অকল, তারার সৈন্য-সিপাই দল লইয়া এখানো দলা অইলা।

20 তেউ হউ জানুয়াররে ধরিয়া আটক করা অইলো, আর যে ভন্ড নবীয়ে তার পক্ষ লইয়া আচানক কাম দেখাইতো, তারেও ধরা অইলো। যেতা মানষে হউ জানুয়ারর সীল লাগাইছে, তার মূর্তির পুজা করছে, অউ ভন্ড নবীয়ে তার আচানক কাম দেখাইয়া অতা মানষরে বে-পথি বানাইছে। ই দুইওটারে জিন্দা হালতে, জালাইল গন্ধকর আগুনির মাজে ফালানি অইলো।

21 হউ ধলা ঘোড়ার উপরে যেইন বওয়াত আছলা, তান মুখ থাকি যে ধারাইল তলোয়ার বারইয়া আইছিল, অখানদি তারার লগর সাংগ-পাংগ অকলরে খুন করা অইলো। এরলাগি হকল পাখিস্তে পেট ভরিয়া অতার গোস্ত খাইলা।

20

এক আজার বছরর বয়ান

1 এরবাদে আমি দেখলাম, বেহেস্তু থাকি একজন ফিরিস্তা লামিয়া আইরা। তান আতো আছিল হাবিয়া দোজখর চাবি, আর খুব বড় একছা লংগর।

2 তাইন হউ দানবরে ধরলা, ইগু অইলো হউ পুরানা হাফ, এর নাম অইলো ইবলিছ বা শয়তান। তারে ধরিয়া এক আজার বছরর লাগি বান্দিলা,

3 বান্দিয়া হাবিয়া দোজখো ফলাইলা। বাদে অউ দোজখর দুয়ারো তালা লাগাইয়া এর উপরে সীল-চাপ্পড় মারলা, যাতে হে অউ এক আজার বরছর মাজে বারইয়া, দুনিয়ার কুন্সু জাতিরে বে-পথি বানাইতো না পারে। হেশে তারে খুড়া কয়দিনর লাগি ছাড়া অইবো।

4 বাদে আমি দেখলাম, বউত তখত আছে। যেরা অউ তখতর উপরে বইছইন, এরারে বিচার করার খেমতা দেওয়া অইছে। আল্লার কালাম আর হজরত ইছার বেয়াপারে জবানবন্দি দেয়ায় যেরারে গর্দান মারা অইছিল, এরার রুহ অকলরেও আমি দেখলাম। এরা হউ জানুয়াররে বা তার মূর্তিরে পুজা করছে না, আর আতো বা কপালর উপরে তার সীলও লাগাইছে না। এরা জিন্দা অইয়া উঠলা, উঠিয়া এক আজার বছর ধরি আল-মসীর লগে বাদশাই করলা।

5-6 ইটা অইলো পয়লা বার মুর্দা থাকি জিন্দা অইয়া উঠা, আর অউ যেরা জিন্দা অইলা তারাউ ধইন্য আর পবিত্র। পয়লা বার যেরা জিন্দা অইয়া উঠলা, এরার উপরে তো মউতর দুহরা বার কুনু বল খাটানি চলতো নায়। তারা অইবা আল্লা পাক আর আল-মসীর ইমাম। তারা হউ এক আজার বছর ধরি আল-মসীর লগে বাদশাই করবা। অইলে অউ আজার বছর ফুড়ানির আগ পর্যন্ত বাদ-বাকি কুনু মুর্দা জিন্দা অইলা না।

ইবলিছ-শয়তানর শেষ দশা

7 অউ এক আজার বছর গিয়া হারলে শয়তানরে তার জেল খানা থাকি খালাছ দেওয়া অইবো।

8 তেউ হে গিয়া আস্তা জগতর হকল জাতিরে, মানি ইয়াজুজ-মাজুজরে বে-পথি বানাইবো, আর যুদ্ধ করার লাগি তারারে এখানো দলা করবো। তার মানুষ অইবা, দরিয়ার চরর বালুর লাখান, ইতা গনিয়া ফুড়ানি যাইতো নায়।

9 অউ সময় আমি দেখলাম, তারা আস্তা দুনিয়া থাকি বারই গিয়া আল্লার পাক বন্দা অকলর রওয়ার জাগা, আল্লার মায়ার টাউনরে গিয়া বেরিলিলো। অইলে আছমান থাকি আল্লাই আগুইন লামিয়া ইতারে জালাইলিলো।

10 আর যে ইবলিছে এরাে বে-পথি বানাইছিল, তাে ধরিয়া জালাইল গন্ধকর আগুনির গাতো ফালাইল অইলো। হউ জানুয়ার আর ভন্ড নবীরে আগেউ অউ গাতো ফালাইল অইছিল। হনো তারা চিরকাল রইবা, আর দিনে-রাইতে জালা-যন্ত্রনার আজাব পাইবা।

রোজ হাশরর দিন

11 বাদে আমি দেখলাম, বড় এখান ধলা তখত, অউ তখতো একজন বওয়াত আছইন। তান ছামনা থাকি আছমান আর দুনিয়া বাগি গেল, কুনুখানো এরার জাগা রইলো না।

12 এরবাদে দেখলাম, হরু-বড় তামাম মুর্দা অকল অউ তখতর ছামনে উবাই রইছইন। বাদে কয়খান খাতা খুলা অইলো, এরবাদে আরো এখান খাতা খুলা অইলো, ইখানর নাম জিন্দেগি খাতা। অউ

খাতা অকলর মাজে হউ মুর্দা অকলর যেতা আমল-নমা লেখা অইছিল, হউ আমল মাফিক তারার আখেরি বিচার করা অইলো।

13 দরিয়্যার মাজে যেতো মুর্দা অকল আছিল, দরিয়্যায় এরার লাশ বার করি দিল। আর মউত আর কয়বরর মাজে যেতা মুর্দাইন আছিল, মউত আর কয়বরে তারারে বার করি দিল। পরতেক জনরে তার নিজর আমল-নমা মাফিক বিচার করা অইলো।

14 হেশে মউত আর কয়বররেও আঞ্জনির গাতো ফালাইল অইলো। অউ আঞ্জনির গাতো পড়াউ অইলো দুহরা বার মউত মানি, আখেরি মউত।

15 যেরার নাম হউ জিন্দেগি খাতাত মিললো না, তারারেউ আঞ্জনির গাতো ফালাইল অইলো।

নয়া পয়দা (২১:১-২২:২১)

21

নয়া আছমান আর নয়া জমিন

1 বাদে আমি এখান নয়া আছমান আর নয়া জমিন দেখলাম। পয়লা আছমান আর পয়লা জমিন মিলাই গেছে, কুনু দরিয়্যাও আর রইলো না।

2 আমি দেখলাম, হউ পবিত্র টাউন, মানি নয়া জেরুজালেম। ইখান বেহেস্তুর মাজ থাকি আর আল্লার দরবারো থাকি লামিয়া আর। কুনু বিয়ার কইনারে যেলা দামান্দর লাগি হাজাইল অয়, অউ টাউনরেও অলা সুন্দর করি হাজাইল অইছিল।

3 বাদে আমি ছনলাম, হউ বেহেস্তুর তখতো থাকি একজনে জুরে জুরে কইরা, “অখন মানষর মাজে রওয়ার লাগি আল্লা পাকর জাগা অইছে। তাইন মানষর লগে বসত করবা, আর তারা অইবা তান বন্দা। তাইন স্বয়ং তারার লগে রইবা, তারার আল্লা অইবা।

4 তাইন এরার চখুর পানি ফুছিয়া দিবা। আর কুনু মরন অইতো নায়, দুখ, কান্দন, কষ্ট আর রইতো নায়, আগর ইতা হকলতাউ শেষ অইগেছে।”

5 তখনতো যেইন বওয়াত আছিল তাইন কইলা, “হুনো, আমি হক্কলতাবে নয়া করি পয়দা করিয়ারা” বাদে তাইন হিরবার কইলা, “আমার অউ কথা খান লেখ, কারন ইতা একিন করার লাখ হাছা।”

6 তাইন আমারে এওখান কইলা, “শেষ অইগেছে। আমিউ আলিফ আর ইয়া, আউয়াল আর আখেরা হুনো, যার পানির পিয়াছে ধরছে, তাৰে আমি আবে-হায়াতর জিন্দেগি-পানির বরনা থাকি বিনা পয়সায় পানি দিমু।

7 যে জন জয়ী অইবো, হে ইতা হক্কলতার অধিকার পাইবো। আমি অইমু তার আল্লা, আর হে অইবো আমার পুত।

8 অইলে কা-পুরুষ, বেইমান, হারামকুর, খুনি, জিনাকুর, যাদুগির, মূর্তিপূজা কররা, আর হক্কল নমুনার মিছা মাতরা অকল জালাইল আগুইন আর গন্ধকর গাতো রইবা। এর নামউ অইলো দুছরা বারর মউত।”

নয়া জেরুজালেম টাউন

9 হউ যে সাতজন ফিরিস্তার আতো আখেৰি সাতো গজব ভরা সাতটা বাটি আছিল, এরার মাজর একজনে আমার কান্দাত আইয়া কইলা, “আও, আমি তুমারে কইনা-বেটি দেখাইমু, মানি মেড়ার বাইচ্চার বউরে দেখাইমু।”

10 বাদে হউ ফিরিস্তায় রুহানি হালতে আমারে বড় এক উচা পাড়র উপরে লইয়া গেলা। নিয়া আল্লার মহিমায় চকচকা যে পবিত্র জেরুজালেম টাউন, বেহেস্তর মাজ থাকি আর আল্লার দরবারো থাকি লামিয়া আওয়াত আছিল, অউ ফিরিস্তায় আমারে অতা দেখাইলা।

11 ই টাউনর রং খুব দামি মনি-মুক্তার লাখান চকচকা, ফটিকর গ্লাসর নমুনায় দামি হীরার লাখান।

12 হউ টাউনো বড় এখন উচা ওয়াল আছিল, অউ ওয়ালো বারো খান গেইট আছিল, বারো গেইটো বারো জন ফিরিস্তা আছিল। অউ গেইটর উপরে বনি ইসরাইলর বারো খান্দানর নাম লেখা।

13 ই গেইটর তিনখান পুবেদি, তিনখান উতরেদি, তিনখান দউকনেদি আর তিনখান পইচমেদি আছিল।

14 ই টাউনৰ ওয়ালৰ বারোটা পিলার আছিল, ইতার উপৰে মেড়ার বাইছাৰ বারো জন সাহাবিৰ বারো খান নাম লেখা।

15 আমাৰ লগে যেইন বাতচিত কৰাত আছিল তান আতো সোনাৰ একটা নল আছিল, যাতে তাইন অউ টাউন, টাউনৰ গেইট আৰ ওয়াল মাপিতা পাৰইন।

16 ই টাউন আছিল চাইৰ কুনি গোল, লাশ্বায় আৰ ফাড়ে সমান। বাদে তাইন অউ নলদি টাউন খান মাপিলে, ইখান লাশ্বা, ফাড় আৰ উচায় অইলো বারো আজাৰ স্তাদিয়া (অনুমান দেড় আজাৰ মাইল)।

17 বাদে তাইন ওয়াল মাপিলা, ই ওয়াল আছিল একশো চৌচাল্লিশ আত উচা। মানষৰ আতৰ মাপৰ লাখান ই ফিৰিস্তায়ও মাপিলা।

18 ই ওয়াল খান হীৰাদি বানাইল, আৰ ই টাউন আছিল ফটিকৰ গ্লাসৰ লাখান খাটি সোনাদি বানাইল।

19 টাউনৰ ওয়ালৰ পিলার অকলৰ মাজে দামি দামি মনি-মুক্তা লাগাইল আছিল। পয়লা পিলার হীৰাৰ, দুছৰাটা আকিক মনিৰ, তিন নম্বৰটা তামা মনি, চাইৰ নম্বৰটা পান্না মনি,

20 পাচ নম্বৰটা সুরুজ মনি, ছয় নম্বৰটা ইয়াকুত মনি, সাত নম্বৰটা লীলমনি, আট নম্বৰটা বৈদুৰ্য মনি, নয় নম্বৰটা পীত মনি, দশ নম্বৰটা উপল মনি, এগারো নম্বৰটা ফিৰুজ মনি, আৰ বারো নম্বৰটা পদ্বৰাগ মনি।

21 বারো খান গেইট বারোটা মুক্তাদি বানাইল। পরতেক গেইট আছিল একোটা দামি মুক্তাৰ। টাউনৰ রাস্তা আছিল ফটিকৰ গ্লাসৰ লাখান খাটি সোনাদি বানাইল।

22 ই টাউনো আমি কুנו এবাদত খানা দেখলাম না, সৰ্ব-শক্তিমান আল্লা মাৰুদ আৰ মেড়ার বাইছাউ আছিল ইনৰ এবাদত খানা।

23 ই টাউনৰে ফৰ কৰাৰ লাগি কুנו চান-সুরুজৰ জৰুৰ নাই। আল্লাৰ নুরৰ মহিমায় ফৰ দেয়, আৰ মেড়ার বাইছাউ অইলা ইনৰ বাস্তি।

24 হকল জাতিৰ মানুষ অউ নুরৰ ফৰে চলা-ফিৰা কৰবা, দুনিয়াৰ বাদশা অকলে তারার জাক-জমক লইয়া অউ টাউনো আইবা।

25 দিনৰ বালা কুנו সময়উ ই টাউনৰ গেইট বন্দ অইতো নায, আৰ হিনো কুנו রাইত অইতো নায।

26 তামাম জাতিৰ ইজ্জত আৰ গৌৰব অনো আনা অইবো।

27 নাপাক কুনু চিজ, হারামকুর বা মিছা মাতরা কুনু মানুষ, কুনুদিনও ইনো হামাইতো পারতো নায়। খালি মেড়ার বাইচ্চার জিন্দেগি খাতার মাজে যেরার নাম লেখা আছে, তারাউ হামাইবা।

22

জিন্দেগি-পানির গাংগ

1 এরবাদে হউ ফিরিস্তায় আমারে আবে-হায়াত, মানি জিন্দেগি-পানির গাংগ দেখাইলা। ইকটা দেখতে চকচকা কাচর লাখান। ইটা আল্লা পাক আর হউ মেড়ার বাইচ্চার তখতর ধারো থাকি বারইয়া,

2 টাউনর বড় গল্লির মাজখানেদি যাওয়াত আছিল। আর অউ গাংগর দুইও পারো জিন্দেগি-গাছ আছিল। অউ গাছাইন্তো বারো জাতর ফল ধরে। পরতেক মাসে মাসে ফল ধরে, অউ গাছর পাতায় হকল জাতির মানষর বেমার শিফা অয়।

3 কুনুজাত লাম্নত আর রইতো নায়। আল্লা পাক আর মেড়ার বাইচ্চার তখত অউ টাউনো রইবো, আর তান গুলাম অকলে তান এবাদত করবা।

4 তারা তান পবিত্র মুখ দেখবা, তারার কপালো তান নাম লেখা থাকবো।

5 আর কুনু রাইত অইতো নায়, তারার লাগি লেমর বা সুরুজর ফরর জরুর অইতো নায়, কারন আল্লা মাবুদর নুরউ অইবো তারার ফর। তারা হর-হামেশা চিরকাল ধরি বাদশাই করবা।

হজরত ইছা আল-মসী জলদি আইরা

6 বাদে হউ ফিরিস্তায় আমারে কইলা, “ইতা হকলতা একিন করার লাখ হাছ। আল্লা মাবুদ, যেইন আগে তান নবী অকলর মাজদি বাতচিত করছইন, তইন নিজর ফিরিস্তারে দিছইন, যাতে থুড়া কয়দিনর মাজে যেতা ঘটবো, অউ ফিরিস্তায় ইতা তান গুলাম অকলরে দেখাইন।”

7 হজরত ইছায় কইরা, “হনো, আমি খুব জলদিউ আইরাম। যে জনে অউ কিতাবর হকল আয়াতর আগাম খবর আমল করে, হে-উ নেক-কপালি।”

8 তে ইছা আল-মসীর সাহাবি আমি হান্নানে ইতা দেখছি আর হুন্ছি। হকলতা হুনা আর দেখার বাদে, যে ফিরিস্তায় আমারে ইতা দেখাইছইন, আমি তানরে সহইজদা করার নিয়তে তান পাওয়ো পড়লাম।

9 অইলে তাইন আমারে কইলা, “না, না! তুমি আমারে নায়, খালি আন্না পাকরে সহইজদা করে। আমি তো খালি তুমার লাখান গুলাম, তুমার ভাইয়াইন মানি নবী অকলর লাখান আর ই কিতাবর হকল আয়াত যেরা মানে, তারার লাখানউ গুলাম।”

10 এরবাদে তাইন আমারে কইলা, “অউ কিতাবর কুনু আগাম খবর তুমি লুকাইয়া রাখিও না, কারন সময় ঘনাইয়া আইছে।

11 যোগিয়ে নাফরমানি করে, হে অলা করাৎ রউক। যেগু খবিছ, ইগু তার খবিছিত রউক। আর পরেজগার জনে পরেজগারি করাৎ রউক, পাক-পবিত্র জন পাক-পবিত্র রউক।”

12 হজরত ইছায় কইরা, “হুনো, আমি খুব জলদি আইরাম, আর পরতেক মানষর আমল-নমার পুরুস্কার আমার আতো আছে।

13 আমিউ আলিফ আর ইয়া, আউয়াল আর আখের, শুরু আর শেষ।

14 “তারউ নেক-কপালি, যেরা নিজর কাপড়-চুপড় ধইয়া পরিস্কার করে, যাতে জিন্দেগি-গাছর ফল খাওয়ার অধিকার পায়, আর গেইটেদি গিয়া পবিত্র টাউনো হামায়।

15 কুকরর লাখান জগইন্য মানুষ, যাদুগির, জিনাকুর, খুনি, মূর্তিপূজা কররা, আর যেতায় মিছা মাত পছন্দ করে, মিছার মাজে চলে, ইতা হকলটি বারে পড়ি রইছে।

16 “তে আমি ইছায় আমার ফিরিস্তারে পাঠাইছি, যাতে এইন জমাত অকলর লাগি তুমারর গেছে অতা হকল বেয়াপারে জবানবন্দি দেইন। আমি তো বাদশা দাউদর খান্দান আর মুল জড়, ফজরর চকচকা শুক-তেরা।”

17 পাক রুহে আর কইনায় কইরা, “আও।” আর যে জনে অউ কথা হুনের, হে-ও কউক, “আও।” পানির পিয়াছে যারে ধরছে, হে আউক। যে জনে পানি খাইতো চায়, হে বিনা পয়সায় জিন্দেগি-পানি খাউক।

18 যে জনে অউ কিতাবর হকল আগাম খবর ছনে, তার গেছে আমি অউ জবানবন্দি দিয়ার, কেউ যদি অউ আয়াত অকলর লগে দুছরা কুস্তা বাড়ায়, তে আল্লায়ও অউ কিতাবো লেখা হকল নমুনার গজব তার জিন্দেগিত বাড়াইবা।

19 আর অউ কিতাবর আয়াত অকল থাকি কেউ যদি কুস্তা বাদ দেয়, তে আল্লায়ও ই কিতাবো লেখা জিন্দেগি-গাছ আর পবিত্র টাউনর অধিকার, তার জিন্দেগি থাকি বাদ দিবা।

20 অউ বেয়াপার অকল লইয়া যেইন জবানবন্দি দিরা, তাইন কইরা, “হাছাউ, আমি খুব জলদি আইরাম।”

আমিন। হজরত ইছা, আপনে তশরিফ আনউক্লা।

21 আল্লার তামাম পাক বন্দা অকলর উপরে, হজরত ইছার রহমত জারি রউক। আমিন॥

খতম॥

Sylheti New Testament (Bengali)
Sylheti: Sylheti New Testament (Bengali) New
Testament+

copyright © 2014 Ahle Kitab Society

Language: (Sylheti)

Contributor: The Seed Company

All rights reserved.

2020-11-30

PDF generated using Haiola and XeLaTeX on 18 Apr 2025 from source files
dated 29 Jan 2022

8c22fe10-239b-5db1-b41d-13aad0957f43